

皇明兩朝疏抄

皇明兩朝疏抄卷之二

君道二

陳謹始之道以隆 聖業疏

陳以勤

恭惟 陛下剛健純粹之質稟之自天高明光大之學養
之有日茲者 出震乘乾統御萬國 德音煥發治象更
新在廷之臣莫不舉手加額躍然奮勵思有以自效其尺
寸而况 臣曩獲侍 經幄奉 清光叨承 恩眷者垂九
年餘居常兢兢焉以靡所裨益為愧乃今躬逢千載一時
之會其叩心瀝膽以效忠于 陛下者敢後時乎臣嘗聞
萬化之原出於君身治道之要存乎謹始易曰正其始萬

事理差之毫釐繆以千里書曰王乃初服若生子罔不在厥初生自貽哲命所言不同其意一也今陛下紹登寶極正履其始上而天地神靈之所顧屬下而華夷臣庶之所觀望前而祖宗列聖九廟之所寄託後而聖子神孫萬代之所效法皆于斯時繫焉儻舉措云爲一或不謹則所失豈細故哉宋臣司馬光曰楊朱見岐途而泣非虛言也臣爲此懼乃敢援古證今條爲十事以獻曰定志曰保位曰畏天曰法祖曰愛民曰崇儉曰攬權曰用人曰接下曰聽言皆有關於君道之重而不可不謹諸始者若夫正心謹學之大要安內攘外之弘畧臣止有待而

不言也伏惟陛下留意幸覽焉臣竊惟人君欲有為于天下其始也莫先乎定志故宋臣程顥有言曰君道之大惟在明善惡之歸辨忠邪之分曉然趨道之正志定而天下之治成矣何者人君主天下之利勢也富貴尊榮所自出也志或不定則事之感于外者何限而吾心汎汎然應之靡所適從凡夫求富貴尊榮者且將窺其間而以不正之端中之矣夫心有所中遂牽引之而不返其流之弊可勝言哉臣竊以為陛下今日之心涵養于積學之久如水之澄如鑑之明以此為帝為王固無不可者但當時萬幾紛至覲伺甚多若不先定其志示人以所嚮往之實于

治化又安可圖也臣愚過計惟願陛下堅持聖志一意以求太平為主此志既定吾心始有用力之地而念茲在茲拳拳焉日趨于正聲色不足以亂之貨利不足以奪之逸遊不足以間之便佞不足以惑之克之不已則志向益純所為益力其致帝王太平之治也何有此定志之術所當謹于始也天下重器也得之固難守之尤難知其難而畏之則天位可保而可恃不知其難而忽之則負荷恐有未能勝者故傳曰君以為難易將至矣君以為易難將至矣嘗觀古之言保位者曰帝乃在位曰予臨兆民凜乎若朽索之馭六馬曰心之憂危如蹈虎尾涉于春冰誠知夫

君位之重不可忽也伏願 陛下俯察此意不以有位為
樂而恒以保位為難在閭閻屋漏之中常若議者之居其
後當積日累月之久不敢頃刻縱其心母以一念之逸豫
而貽四海之憂母以一時之驟畧而致千百年之累民雖
安輯也而嘗恐其禍離政雖修舉也而常恐其廢墜世雖
治安也而嘗恐其亂危如是則可以永保天位而 國家
之祚垂于億萬斯年矣此保位之難所當謹于始也天人
相與之際流通問問事作乎下象動乎上不可誣也在昔
成湯顧諟天之明命文王小心翼翼昭事上帝皆能祈天
永命後世相之彼豈不知以為天人遠不相涉惟所欲為

而莫之懼及大命既去悔何及矣由是言之天雖高遠日
監在下人君舉動以禮則福祉隨臻一有私僻則咎殃必
至影響鼓桴莫喻其捷可不畏哉伏願 陛下深察天道
之甚邇務修德正身以為順承之實雖處幽獨而常若降
鑒之孔昭雖對臣民而常若在帝之左右凡發諸念慮必
思曰得無拂于天心乎凡施諸政事必思曰得無忝于天
工乎一瑞應之見不以自侈益懋德以副之一災異之臨
不以自諉必引咎以回之如此則 上天孚佑景福熾昌
其于維新之治不有光乎此畏天之誠所當謹于始也治
道不必遠引前古其要在乎善法當世之盛憲而已故夏

遵禹訓尚奉湯典周守文武之謨烈何其惓惓不敢忘哉
蓋祖宗立業其更事也詳則其防患也深其謀慮也遠則
其立法也密故子孫承之百司以世守而無弊苟非至於
大壞固未易以更變也至孫世則不然或自作聰明狹小
制度或庸昧寡識蔑棄典章之國無籍焉何以為治洪
惟我太祖肇造鴻基成祖嗣承大烈其勞心焦思垂
訓立法以為子孫萬世計至宏遠矣伏願陛下思貽
謀之深隆繼述之孝以天下者祖宗之天下必法其所以
為治人民者祖宗之人民必法其所以為養官爵者
祖宗之建置不可授之非其人府庫者祖宗之蓄藏不

可用之非其道至于聽治之暇尤望恭取祖訓置之座右細加省覽守而勿失仍申飭中外諸臣凡有關於成憲者一切遵率如故則曩時平治之畧足為今日守成之規所謂率由舊章永無愆矣此法祖之善所當謹于始也聖王以一身立乎萬民之上能固結其心而使之無亂者亦惟能保愛之而已故禹感臯陶之言則曰安民則惠黎民懷之周官大司徒之職亦曰以保息六養萬民可見愛民實為人君之先務繼世之主率多生長深宮于民間疾苦不能盡知遂使宸慮不經于四方君門隔絕千萬里冤痛結于民而上不恤窮愁徧于下而上不聞不知民猶水

也君猶舟也水以載舟亦以覆舟民以載君亦以溺君而
可忘情也哉伏願 陛下重念民為邦本弘施曠蕩之恩
大慰黎氓之望民好安逸也無工役以苦之民急衣食也
無暴歛以困之貪吏非所樂者黜之以悅其心法禁非所
便者 蠲之以順其意而 聖衷尤當念念在民毋以巖
廊之尊而遺草澤之賤毋以萬乘之安而忘匹夫之憂斯
溥海內外均蒙休澤而民有不懽然戴土者乎此愛民之
心所當謹于始也自古帝王莫不崇尚節儉故唐堯所居
之室茅茨土陞大禹非食周王卑服民到了今稱之後世
若漢文帝惜鹽豎百金之費身衣弋絺足履革鳥朱仁宗

見後宮首飾珠玉輒閉目不視我 太祖乘輿服御以銅
代金 成祖所服衣袖至千敝垢此豈不知享有四海之
富而顧靳于此其意或以一錢八帛皆出于百姓之膏脂
故下忍妄用焉相沿至後此意遂泯靡費金帛有如泥沙
毋惑乎上下之積益空百姓益感感窮苦也伏願 陛
下以此軫念先帝所司會計帑藏之數嚴其出納仍取弘
治以前支費舊籍一一遵行而又 躬尚儉朴為天下先
宮室之奉但仍舊貫乘輿服食之物悉加裁省凡宮中冗
聚之人奇巧之玩無名賜予無度取索一切出而罷之庶
幾遠近向風家給人足而天下治矣此崇儉之意所當謹

于始也權柄者神聖之所資也故當常使在上而不可使
在下洪範有言惟辟作威惟辟作福臣無有作威作福言
政當一統權不可分也漢之衰也元帝移于近嬖孝成委
于臣下至唐永淳間悉歸宮掖天子拱手而已此所謂倒
持太阿而反授人以柄未有不傷敗者矣宋臣呂公著曰
欲威福之不移莫若捨已而從衆衆之所是我則為之衆
之所非我則去之夫衆未有不公而人君獨為天下公議
之主威福將安歸也斯言良為有見伏願 陛下深玩此
意凡 朝廷有大興革人材有大進退治道有大刑賞先
與諸大臣參詳可否而 陛下方臨以日月之明奮以雷

運之斷 躬自裁決而施行劑量一出于 淵衷諮詢不
及于近昵庶幾臧固于內權重于外治天下可運于掌上
又何患焉此攬權之要所當謹于始也古稱明君者惟在
辨君子小人而用捨之故雖唐虞之朝俊乂在官而所以
難壬人者猶加謹焉況後世乎嘗觀齊桓公始任管仲則
興後任非其人則替唐玄宗始任姚宋則治後任非其人
則亂夫以一人之身委用不同而利害懸殊如此則所關
係亦大矣哉我 太祖嘗言用人之道當知姦良若知良
而不能用以姦而不能去則誤國自此始伏願 陛下以
此為鑒于內外臣工一一清心以圖簡照之方大抵君子

多敦實行小人多託空談君子多體國任事小人多謀身
規避君子多而折廷諍小人多阿諛順旨君子多為國
賢小人多妨賢病國由是以觀庶可盡得其情實夫然後
因人而進退之一則優禮保全使得畢其靖獻之忠一則
深慮曲防使無容其巧投之術如此則衆賢之途開群枉
之門塞而大業可成矣此用人之方所常謹于始也君臣
之分等諸天地然天地之氣必交通而後萬物可成君臣
之情必相孚而後理道可立故帝舜之于大禹曰臣哉鄰
哉鄰哉臣哉高宗之于傅說曰朝夕納誨以輔台德其一
時相與之氣象何其親且密也後世君之于臣太相隔遠

于朝參之外接見頗疎遂使經邦之道闕疇咨于大猷宴
安之私溺偏信于近習有如昔人所慨者惟我祖宗之
朝每每召見群臣講論治道至於大誥首篇特著君臣同
遊之訓其意遠矣伏願陛下篤一體之誼于退朝之暇
即御便殿召文武大臣入內與之親接或訪以撫夷夏和
陰陽之道或詢以進賢退不肖之方或于簿書之外命極
言臣隱或給筆札俾疏陳時務庶幾君臣道合血脉流通
政事舉無不當而世道可登諸理矣此接下之規所當謹
于始也人君以聽言為尚故言路有通塞天下之治亂係
焉孔子曰天子有諍臣七人雖無道不失其天下所以

祖宗臨御之時文武軍民凡有可言之事許且至御前陳說此無他以人君一身之寡而應萬幾之繁必有所不知因之寄耳目于言者且闢而廣之所以圖天下之治也方今更新之始在臺諫諸臣知必畢竭心腹以論天下事伏願陛下大開言路凡政令之得失百姓之休戚群臣之忠邪使之皆得直言無隱其言之當者納之用之且顯擢其人以示勸其未當而或過訖直者亦涵容而不加罪夫以言者上逆龍鱗而犯忌諱下結讐怨而取禍患亦何所利哉其心蓋忠于國也不諒其心而挫折之則勁氣消沮忠臣杜口漸漬不聞其過遂以階亂豈非大失者乎此

聽言之公所當謹于始也右臣所言以 陛下美明天縱
加之 銳意更新知皆優為之無難而臣獨懷此區區貪
于傾竭不自知其言之繆妄亦以唐虞成周之君古之所
謂聖人也而其臣乃以就業陳謨抑畏作訓蓋恐忽之于
微世必有以受其病縱之于早後或無以圖其終故其言
不能已也臣愚淺劣固不敢上擬古之賢臣然欲致 主
上于唐虞成周之盛是臣犬馬一念之忠也竊不自揆輒
敢敷陳觸冒忌諱懼 陛下不以臣鄙猥常談或有可取
即留中省覽一一裁而行之則于 中興聖業亦庶幾有
毫髮之助此實 宗社生靈之幸不但臣一人受賜而已

效愚忠陳末議以仰裨 聖治

吳 嶽

臣待罪南銓曾無善狀思少自靖日獻其近無繇每念衰病侵尋精力困憊恐一旦隕先朝靈輿無以報塞萬分徒負 恩私將不瞑目於地下矣謹條陳六事用塵 上覽伏望 皇上採擇施行臣不勝幸甚

一日勅召對臣聞高宗之於傳說也命之曰朝夕納誨以輔台德乃置左右勉以交修而說也惟猶豫是戒師古與學是訓茲用克紹先王為有商令主恭惟我 皇上懋勤聖學 日御經筵豈不以 養德進道在是乎顧 經筵率拘常例 皇上之聽講也不終日曾無反覆問辨之功

儒臣之進講也有成規殊無從容啓沃之益時方欽承靡
暇而感動無繇實效鮮矣臣愚以為經筵之外莫若於
退朝之暇仰遵祖宗成憲皇上時御便殿召進輔臣
或講學論道上下古今於一切軍國重事參謀議而審行
之則咨諏善道詢納讜言謨明弼諧之風將復見於今
日矣敢乞聖裁

二曰附輪對臣聞漢文帝入蒞大統首問丞相陳平曰一
歲決獄幾何錢穀出入幾何平曰有主者即問決獄責廷
尉問錢穀責治粟內史識者以其言為知體正以當時無
輪對之制所問非職掌之人故平對乃尔自今言之大小

九卿森布在外而分職任事各有攸司若非延接之勤咨訪之教其何以考庶政而綜覈其名實耶顧今皇上接見群臣不過視朝之頃耳且朝見自有定儀即奏對常規姑取以塞責若事關大計非數言可了其憐憫之誠自難以上達也臣愚以為常朝之外當更煩聖慮將各部院等衙門編為班次分定日期每臨期皇親御便殿暫免朝參依次召入輪對其科道官亦得分番參與可否九錢穀兵馬禮樂刑名民風吏治之汙隆政教紀綱之得失皇上一二番清問令其各照職掌次第敷陳斯聰聽之下自足以得其要領久之則人品優劣職

業修否悉難逃於 聖覽即諸臣數觀 天顏仰承 休

德亦罔不知所奮勵而庶績其凝矣敢乞 聖裁

三曰容直言 臣聞山有猛獸藜藿不採朝有直臣奸宄不

生良以直言者决壅去塞邦家之利也今之諫官言事或

識未通練意每失於稍偏氣涉輕浮詞多傷於過激所謂

犯忌諱觸逆鱗有弗遑恤者矣伏望 皇上少霽天威曲

加寬宥其言果善不徒加納而已即亟見之施行其言未

善姑置之勿論耳不必加之以責罰有優容而無嚴譴所

以倡敢諫之風廣納善之路也假令言出禍隨動先咎至

人人率以為戒將使賢智結舌忠貞杜口大臣持祿而不

極諫小臣畏罪而不敢言萬一有伏奸隱惡其誰肯踊不
測之禍為 皇上陳之語曰一指在前泰山不見壅蔽之
謂也敢乞 聖裁

四曰崇節儉 臣聞古之聖王莫不以儉為貴故堯稱茅茨
土簋禹稱卑宮惠服漢文身衣弋綈足履革舄亦惟省財
以養民敦樸素以為天下先耳恭惟 皇上登極之初

下蠲貸之 詔罷侈靡之供四海之民莫不延頸跂踵嚮
嚮望治以為更生之辰也 節儉之風聞於天下久矣邇
來忽聞 內帑匱乏復取足於戶部人人駭之且戶部所
掌財賦乃軍國重費一切邊方 奏討兵馬支用皆仰給

於此倘餽餉稍缺調度不克則患伏肘腋豈直司國計者之憂哉此費之決不可省而儲之不可不饒裕也若內帑則尚有可權處者伏乞皇上於賞賚服食之需裁損從嗇玩好靡麗之物屏棄勿陳誠一崇雅素則可省者自多可費者自少積之久寔富有餘羨矣不然財源已竭摻括已空此外無他術也敢乞聖裁

五曰正題覆臣聞國是不定孫叔敖昔以為憂何邇來言事者執德不弘徃徃各持己見凡有建白期莫敢為少有異同即生他議以致法用立而弊生令朝行而夕改意見紛紛何時定乎伏望皇上勅下部院大臣凡遇各官

建議下各衙門議覆者事果簡易可以變通宜時人人稱
善即題覆中丞請施行務有以應乎輿情事苟乖違徒
爾紛更滋弊人人稱不善即題覆申明列是非不必曲
徇乎彼見惟求事理允當無嫌於人已相形大臣絕黨比
之私言官何恩怨之有此受益之道取善之公人臣爲
國而非爲身也敢乞 聖裁

六曰復執奏臣聞 內批下各衙門稍有干碍者大臣遂
有執 奏必直陳利害明列是非準則 典章援引事例
積誠布款務以感悟 聖心在早塞弊端永絕禍本斯功
實不謬而大臣之節屹然矣設以 成命不可復回姑委

曲以聽回紇是自為之地而謀國疎矣脫有權奸乘釁事
伏隱微其害未有易言者將誰任其咎乎昔玄宗停斜封
而致開元仁宗收內降而臻慶曆此前事之驗也伏望
皇上離明洞察 勅下各衙門務秉忠赤凡事應執 奏
無但首鼠兩端重貽後悔斯上下之情通而依憑城社者
無施其計矣敢乞 聖裁

務學親賢養聖體以慰群望疏

卽夢雲

臣等伏聞陛下入春以來聖體益覺違和今雖暫就平復是自天祐之然臣等私憂過計以爲微陽之復當保小愈之後尤慎况以陛下身為天地祖宗社稷臣民之主厥繫甚重不可不謹凡茲致疾之由蓋緣陛下年方冲幼血氣未定宮闈之內或不能以禮防制以致聖體有所虧損即今以後再不加息日服一日為疾益添後悔何及此臣等積憂之餘情不能已故不避斧鉞為陛下言之夫宮闈深遠最久之所難言亦人之所忌言是故以子之親尤不能得之於父况於君臣之間

乎然竊念此等事關係甚大使遂以為難為忌而不言之
其為不忠莫此為甚伏望 陛下恕臣等之狂畧臣等之
實少加 悉納其於 聖體不無少補萬分之一 臣等萬
死萬死自昔聖帝明王為天子富有四海之內無求不得
無欲不遂若可以自肆矣然必自朝至晷戰兢兢居內
之日常少居外之日常多保惜愛護若恐有一毫之不至
者何也蓋所以防情欲之過養性命之源務使志氣清明
身體強固上以副天地 祖宗 社稷臣民之望下以演
子孫千億之福皆係於此也夫元氣之在人身如木之根
水之源木傷則枯水傷則竭人傷其元氣則軀體得

弱精神短少壽命不宏子孫不蕃是以上世之君每謹於
此率多壽考久於其位而子孫最多末世之君往往不及
故其歷年昌後亦每不前人若也蓋上之則無欲次之則
能寡欲下之未免有欲非惟不能寡而又縱之此其所以
不同而其效驗昭昭也然欲之道惟在於正心蓋欲者
邪之動正心之道古先聖賢皆有成論然其最親切緊要
者則莫如真德秀氏德秀之言曰惟學可以養此心惟敬
可以存此心惟親近君子可以維持此心蓋理欲本交戰
邪正每相形真萬世聖學養心之要道也伏望 陛下以
此言爲法於視朝之暇退御文章殿將古聖賢書籍日賜

披覽凡義理之可養心道術之可以為治者皆探索其精
微考究其議論又於經筵日講諸官揀擇其中其人醇
謹端厚文學優長者數員與之講論以資啓沃凡宮闈
所行之事使彼皆得聞之儻有所失庶得以時匡正至於
元老大臣尤宜日賜召入訪詢治道至日夕乃罷退朝
之後以禮制心以義制欲務使暗室屋漏之中不忘上帝
臨汝之念鼓瑟鼓琴之際常存摯而有別之規則心不期
正而自正欲不期暴而自寡矣若然則君身強固君德
清明宗社有萬年之休子孫演千億之福非惟臣等之
幸實天下國家莫大之幸也夫苦口之藥治病者利病

拂心之言治國者有焉惟陛下留神俯納臣等無任願
望之至

正 國體懷群心以全 聖素願 事 儼

臣伏見 陛下繼統之初慮已用賢養老勵物凡我臣工
莫不一心一德相與輔致太平但議禮之時群臣各陳所
見不無異同蓋去古既遠禮文殘缺聚訟之喻從古則然
遂至遠近漸成否隔姦人乘之惑上譏下無所不至 國
體既壞人心亦拂 陛下聰明天授豈不知之蓋純孝之
心無窮禮儀猶未全備不能不為固蔽之也今 世廟告
成而祀享之儀咸備 實錄既進而尊崇之典大彰臣下
何復紛擾奸諛何復觀覲易曰遇雨之吉群疑忘也言剛
明居上揆孤之終自當釋合悔悟更新洗滌瑕疵此其時

矣傳曰得四海之懽心以祀其先者然後為天子之大孝
欲得四海之懽心未有不自廟堂始當此之時宜有曠
蕩之恩以昭雪幽枉與天下相忘於蕩蕩平平之域謹
昧死敢以正國體懽群心二事為陛下陳之

一曰虛心以廣聖度臣竊謂陛下之於群臣如天地

之於萬物燕喜博愛未嘗有偏特見近日言官累疏欲加
死者恩典欲復實謫名籍未蒙俞允又加應該遷陞
舉遣官員率多從中阻格以迹觀之似陛下尚欲較計
議禮異同而督過之未忘爾大議裨諸臣固守一得之愚
不能斟酌從宜以觸天威自取罪戾又何言說但其初

心亦欲以此獻忠 陛下以效區區而不知其拂戾一至
於此拂戾之迹既以取怒 陛下其區區之忠亦與 陛
下平心亮察之也况忠心一伸萬事可冰釋矣伏望釋去
前疑不主先入處以無心示以至公向日打死竄謫諸臣
俯從言官論奏量為優卹叙用各該遷轉差遣官員有常
格者俱照常格使天下瞭然知 聖心虛明應物真如天
地之無私無物不在覆載之中矣天下幸甚 二曰果斷
以消朋黨臣竊謂 大禮已定前事既往天下猶有萬機
人才不可槩必正當靖恭分理萬事之機公平以盡群才
之用豈可獨揭議禮二字為的於天下使人無賢否惟望

其的之所在而趨之近見文武臣工章奏文間必牽引議
禮者十常七八或以擠排善類或以援引黨與或以翻異
成獄或以脫免罪逆或以變亂舊章無耻若耶助亦將
援此遮飾愆尤固不特庸庸等數臣而已彼其意以 陛
下聰明洞察難於欺罔惟此一事足以取信若 陛下既
信從之大小臣工誰敢異議於是鹿馬可以易形白黑可
以易位天下事惟吾是聽無不如意矣蔡京之紹述秦檜
之和議欺上禦下用此術也國家受禍不遠之鑒况 朝
廷之間朋黨一立四方效之駸以成風臣見內外百司同
事則相傾同官則相陷肆其褊心以相詬病攻乎異已而

代之位者往往皆是也此豈清朝盛事耶伏望陛下
察往古安危之故究群臣忠邪之實奮乾剛獨斷之權
以破背公死黨之私向之議便是而行事非不以其是而
掩其非向之議禮非而行事是不以其非而沒其是百司
庶府毋得動相傾陷奏牘之間毋得牽引舊事如有仍前
諛佞無耻煩瀆天聽惡怒足馮陽攻陰擠者聽臣等劾
奏降旨切責或即坐以奸惡之罪使黨與潛消時靡有
爭宗社之福也天下幸甚

圖政理以慰人心疏

石星

臣聞天下之治不日進則日退人君之心不日強則日偷
適今四序更始之期正萬國維新之會矧庶職來同之際
尤羣心屬望之時苟因循玩愒日甚一日則不但將來治
效未可遽臻即欲長如隆慶元年之治亦不可得矣臣本
草茅寒士至愚極陋遭逢聖明待罪該科思欲補過拾
遺其道無由切見皇上入春以來天顏漸穠視朝漸稀
章奏頻閣經筵屢廢雄心銳志不無少減於初年怠政惰
萌將大貽感於後日臣目擊耳聞心實用憂欲過此而言
則日月侵奪漸不可長今正月已畢天氣正融皇上不

以此時勵精圖治更復何俟臣子不以此時發憤直言更復何為是以不避斧鉞上陳六事咸切於 皇上之身心今日之要務至其節目之詳施為之序姑未之及焉 一曰養聖躬夫人主一身乃 祖宗之所付託萬民之所瞻仰關係至重不可不養然養之之道節飲食寡嗜慾其要也恭惟我 皇上即位初年清心省事飲食起居咸中於禮無容議矣近則有不盡然者試以鰲山一事推之夫為鰲山之樂則必縱長夜之飲飲食其能節乎為長夜之飲則必縱聲色之欲嗜慾其能寡乎語曰皓齒蛾眉命曰伐性之斧甘脆肥膿命曰糜腸之藥昔賢以為名言今人以

起居注

身

可及乎今釐山之事已往不可追陳

酒色之害今尤可深警伏願 皇上念關係之匪輕懼

酒色之深累由此節飲食寡嗜慾為禹之惡旨酒為湯之

不遠靡色則血氣充盈精神強健 萬壽無疆而兆民永

賴矣 二曰講聖學書曰王人求多聞時惟建事學於古

訓乃可獲古人君膺智特達雖由於天縱而啟迪開導必

資於國學故我 祖宗有經筵日講之制定於二月內舉

行蓋天氣融和則功夫之進脩為易萬象咸熙則人君之

政治宜新累朝相承率由不廢所以建大業於前垂洪祚

於後者賴有此也。今經筵一事，節有言官申請未見，慨然舉行，切恐倏而春矣，倏而夏矣，倏而秋矣，歲月愈邁，德業無聞，不亦重可惜哉！臣故不厭煩瀆，特為申請，伏願皇上以務學為急，以明理為要，將經筵一事及時舉行，則緝熙光明而帝王心學可考之而不謬矣。三曰勤視朝。人君裁決庶政，通達下情，莫先於視朝。故南面之訓，著於書；未央之戒，嚴於詩。知此為重也。陛下即位以來，未明而衣日旰而食，視朝可謂早矣。歲無虛月，月無虛日，視朝必來，則似稍倦於勤者，豈獨元日乎？

亦宜然或有奸諛之徒迎合 聖意必有以 先帝二十餘年不出宮闈天下宴然勸 皇上效尤此則大不可者蓋 先帝雖不視朝紀綱振肅大阿獨持故百司奉行可幸無事至其賓天之後詔有曰朝講之儀久廢則亦悔之矣今 皇上當朝儀久廢之餘萬事叢脞之後若不再加勤勵何以保厥有終伏願 皇上日日視朝以周知乎民情以總理乎萬幾不惟可以作精明之治亦可以快觀覩之私矣 四曰速俞允蓋人臣隨事建言異人主之聽人主聞言俞允誘人臣之言也故君無稽命臣無隱情上下相達治化可舉 皇上即位初年臣下有言未常不允也未

常不速也。雖或事涉無當，不宜俯從，亦速降明旨，不致遲悞。今則臣下進言有允、不允者矣。不允者固未審何如，而允者亦違常期矣。是豈愚言拙計不當？聖心故濡滯以示警也。抑亦左右內臣遏抑章奏，不使達於宸聰耶？臣常因而數之事，有關於聖躬者，則留中不下；事有關於內臣者，則稽遲不允。甚或有以此得罪如此，則雖有指鹿為馬之欺，南召喪師之禍，亦無由以知之矣。且尋常章奏稍緩可也。若於北虜消息、軍機重情呼吸之間，便有利害，若或稍遲為禍，不細伏望皇上從此於尋常章奏則三日而下，其兵機之事則當時進覽。庶綸音速示而壅

蔽可通矣 五曰廣聽納古者有進善之旌有誹謗之木
所以開治道而來諫也 皇上即位初年虛心求諫仍詔
軍民人等直言無隱雖其盛德何以加矣後以太常寺少
卿周怡言事誤犯忌諱 皇上遂怒而遞之外職又以禮
科左給事中陸鳳儀言事偶遺 聖旨皇上亦大怒而斥
之為民夫談犯忌諱非巨慝也遺落 聖旨非大不敬也
若有蔽賢納諫之臣不審又何以處之乎故二臣去而言
路以塞矣夫願 皇上廣俞受之量大樂善之誠仍召二
臣復還舊職再諭諸臣勿以二臣為戒則忠言至計因而
畢陳於冕旒之下矣 六曰察讒譖孔子曰浸潤之譖膚

受之愬不行焉可為明也已矣故成王息二叔之流言昭
帝識上官桀之詐古今仰其至明以能辨於此耳方今公
道昭明幽隱必宣讒說殄行庶乎絕息且帝居九重君門
萬里雖有讒譖無階上達近有一二內臣專權威福肆為
無忌因言官攻發其奸遂目切齒欲行中傷矣其所以中
傷者不過即其諫諍之言或過於直則曰此人欺皇上
過於激則曰此人慢皇上偶一言之尚不允從漸漬既
久自不覺其入而發之怒矣怒則譴責加焉而彼忿戕矣
夫人臣盡忠直以獲罪譴固其職分亦所甘心但恐臺諫
由此喪氣諍臣由此杜口彼益得以遂其無忌憚之為而

天下將至於不可收拾此固非人臣之利亦非國家之福也伏望皇上深察其情於凡一切譖毀之言悉置不行保全善類而天下之至明必歸矣夫當今之時胡虜猖獗國計空虛其他皆理傷道之事不知其幾更改損益之政尚費神思悉置勿論而以六事首陳者非無謂也蓋此六事俱干皇上之身心當今之急務六事既脩天下之治可徐而理也臣憂深慮苦發詞狂直非不知觸怒聖懷干犯群怒但念慾不可縱機不可失故為剴切之談以徼萬一之聽倘聖心由此轉移美業由此克終則雖干冒斧鉞亦所不辭汲黯曰天子置公卿輔弼之臣寧必

縱諛承意諂主不義乎正臣今日之謂也伏望 皇上鑒
犬馬之微忠採芻蕘之過計將臣所言俯賜加納仍由此
以往面召輔臣以通上下之交躬覽章疏以達軍國之務
選將練兵以解疆場之危節用省費以裕經制之計於凡
節目之詳施為之序一一悉心講畫咸底成績精明之志
與天同健雍熙之化與春俱融豈直斯民不勝願幸即
祖宗德業亦有遺光焉

安內攘外以隆中興

何維禎

臣以迂愚蒙 陛下召用叨受今職感激趨赴入侍 朝
班得覲 天顏端穆 聖德仁明納諫受言事從至當
經筵日講學務時敏羣工在列濟濟跄跄奏事承 旨莫
不祇慎大臣奉公小臣守法苟直不入請託不至盡洗往
昔專恣貪黷之習 清平景象臣謂此出竊幸遭逢夙夜
矢心隨分盡職以事 陛下固不敢以言塵瀆 天聽但
觀今時事尚切隱憂有不容已於言者仰惟 陛下踐祚
之始正世道 維新之會固宜 天心克享災害不生化
行俗易效尤不作 中國尊榮外夷賓服馴致 盛治顧

今有未盡然者臣自外來江淮南北百姓罷病艱苦萬狀
官府威信不立上下不相維繫民恣頑僧軍逞驕悍士踵
流訛以下凌上以賤辱貴法紀陵替漸不可長比至畿
甸淫雨釀災傷稼圯廬餓莩委野加之遠方州郡山酋海
醜尚多竊發頃者土蠻東犯永平俺荅西躡石汾荼毒之
苦慘不忍聞至於陷城虜官百十年來實所未有將弱兵
疲緩急何恃虜情叵測後患當虞臣竊為陛下憂之夫
當此內憂外患之時正陛下奮勵警惕之日故臣敢以
脩德安攘之說告陛下然所謂脩德者非有難行之事
不過自陛下之聽講視政者加之意耳臣願陛下

每於講讀不徒聽之以耳而聽之以心將所說經史容析
疑義務稽帝王脩德立政之方古今治亂興衰之迹以為
法戒又於大臣中有才德可資啓沃者推舉數人俾班講
讀諸臣或輪次入直以時召見以備顧問要知心何
由而可立身何由而可脩家何由而可齊國何由而可治
天下何由而可平內治何由而尊嚴外夷何由而制服講
明而力行之及退居宮中擇老成謹厚內臣諸人服勤
左右崇護聖躬俾遊處有常度幸御有常節則出
入起居罔有不欽聰明睿智皆由此出以此敬天法
祖以此用人行政無不可者每日朝講之暇請御

便殿與執政元老商確治理將中外臣工所題事務撮其
關係重大緊切要畧開坐 上請裁確施行仍 召部院
大臣詰問所司如進退百官當何以久任責成以熙庶績
而責之吏部錢穀會計當何以量入為出以經制 國用
而責之戶部 憲章典制當何以品秩名分以端習尚而
責之禮部詰戎禦暴當何以簡師練兵以安邇控遠而責
之兵部刑罰獄訟當何以明允 欽恤以使民不寃而責
之刑部水利土木當何以興革罷行以節紆民力而責之
工部貞僚肅度當何以振揚法紀以風勵天下而責之都
察院其餘職掌悉付所司 陛下提挈大綱 時賜叮嚀

則百工愈加警勉和衷協寅爭相磨濯以趨赴事功如有
怠玩及不當於職者言官據事論劾使不敢肆況近日當
事大臣多有誠心體國其隆委托正人布列足備
任使但臣子去留無常後先識見或異陛下宜及時將
天下國家機務悉心共為圖理以預桑土綢繆之防且我
皇上春秋鼎盛正當憂勤惕勵未明求衣日旰而食苟
非隆冬盛寒不宜屢輟朝講兢兢業業以理萬幾不
可自暇自逸蓋天下安危生民休戚人心向背天命去
就皆繫於陛下之一心陛下之心正則發
見遂以正朝廷以正百官以正萬民天下莫敢不正

此古帝王所以安中國而撫四夷以成中興盛治者
用此道也伏望陛下詳察臣言果有可採亟與諸大
臣裁酌而力行之則宗社幸甚天下幸甚臣無任祈望
恐悚之至

陳膺見以裨時政疏

曹讓

臣聞上下交而德業成德業成而天地泰古之聖帝明王未有舍此以言治者也陛下改元一詔流澤寰區雖深山窮谷莫不喜若更生臣亦手舞足蹈以為復覩漢官威儀也詎意甫及二載漸不克終豈如真觀之盛尚延數年而後可議也哉抑陛下志慮未定而有多岐之惑邪果左右匪人而坐蒙蔽之術邪嗚呼多岐之惑涵養可充也蒙蔽之術膏肓可慮也傳有曰殷鑒不遠在夏后之世開元天寶若出二君元祐豐寧分為殊軌其治忽盛衰不待智者而可知也陛下嘗念及此否邪臣不暇毛舉

縷悉上瀆 聰聰敢以時事之大且急者疏為六條伏乞
推揚園之道採葛荒之言親賜 睿覽次第施行臣愚幸
甚天下幸甚

一曰謹嗜慾君身者天下之本 陛下春秋鼎盛其在血
氣未定時也椒寢未繁宗桃攸繁必也法健順之德以成
關雎之化則螽斯綿綿而國祚有萬世之固矣二曰勤召
對人主接賢士大夫之時少親宦官宮妾之時多 陛下
初幸太學時聽經慈臣已窺求道之盛心矣第崇重雖隆
啓沃未格規諷雖寓問難不施必也退 朝之後復御便
殿或召元老大臣或命翰林儒臣咨而訪焉移時漏下不

罷試較之深宮燕閑群小比附天理人欲果孰勝邪持以
歲月功效自見三曰明進退人主進一有德則百工勸退
一不肖則百辟懲治亂之原實出於此如戶部尚書孫交
刑部尚書林俊二臣者累朝舊德一旦起而用之誠所
以勸百工也夫何柄用未幾二臣建明多未採納甚至回
話以窘俊而交因有齒寒之疑所以屢疏乞休請骸骨之
心方未已也伏望 開誠溫諭言聽計從務俾弼成正大
光明之業如工部侍郎陳雍衰而可令致仕者也乃留以
供職巡撫四川都御史許廷光貪而可令罷黜者也乃留
以調用國子監祭酒趙永師儒之官風化之首屢被人言

五經掃地乃復賜勉留未亦何顏侍講帷之側臨士子之上哉必也嚴禮義之防昭勸懲之典則人存政舉而治功可成矣四曰杜請託明主愛一頓一咲昭侯藏敝袴以待有功 詔罷傳陞固有出於頓咲敝袴之外者矣近者內豎之請廕外戚之請第隨乞隨與大啓私門臣恐曠蕩之恩難飽溪壑之欲氣洩針芒堤成蟻穴不可不預為之防也凡非分干請一切擯絕不與乃所以兩利而俱全之也五曰重綸音易曰渙汗其大號書曰大哉王言蓋王言者出焉為經天下後世所憑藉也近聞 上意批荅間亦不由內閣如翰林院編修張潮奏緝 聖學以培治本乃批

曰該衙門知道不知所謂該衙門者何所指也大臣建議
言官交章乃屢批曰已有旨了不知所謂旨者是歟非歟
傳稱成湯改過不吝亦皆非耶伏望用遵 成憲俱付內
閣擬票庶政體歸一而令出惟行矣六曰禁偽行晉尚清
談祀遂不振宋搖國是脉因以微習俗移人不可救也蓋
孔大聖也顏孟大賢也程朱大儒也心學淵源萬世不墜
近者邪說橫流壞人心術一人倡之百人和之雖號為士
大夫標榜道學互相推獎夷考其行則有大不然者不過
欺世盜名以為利祿之階耳始則甚微而末流無所不至
乞 勅禮部申明榜示痛加禁革庶敦士習而崇正學實

聖王教化之源也

竭瀝血忱以圖報萬一疏

周怡

臣竊惟受非常之恩者當有非常之報遭希世之過者當
陳希世之義臣狂愚小臣不識大義原任吏科給事中屢
荷先帝知遇感激圖報於嘉靖二十二年因論輔臣嚴
嵩等專權內有先帝日事禱祀未能殄四方水旱之災
致怒廷杖下錦衣衛獄桎繫五年再逮再釋當時人皆謂
臣必不免於死矣倖而免死臣母在家病危屬纊望臣一
面而不可得人皆謂臣母子必不可得相見幸而相見復
愈十三日乃終此皆蒙先帝非常之恩臣母子感激何
可云喻臣舉家感激何可云喻臣常思粉骨糜軀何以報

荅萬一惟朝夕仰祝 聖壽萬年 皇圖永固庶少盡愚
誠而已恭遇 皇上膺天景運嗣登大寶念 先帝遺詔
推廣德心湔滌臣罪召復臣職歷陞太常寺少卿臣以五
年之繫萬死之餘兩次釋放生還送母終年臣之際遇至
矣極矣又得耕田而食汲井而飲二十餘年臣之殘喘餘
生皆 先帝之所賜 皇上之所庇也臣之願望極矣足
矣何敢復望收錄召用此誠非常之恩希世之遇古今以
來所希覩也臣當何以仰報萬一夙夜深思惟願 皇上
萬有千歲永保四海之富長居 九五之尊子孫千億萬
邦協和庶幾臣之野心少紓萬一雖然富貴壽考子孫治

安之久長者非徒然可得也必有德以享之德非徒然可有也必有道以脩之學也者脩德以享福祿之道也學非徒然可能也必有師以啓道之必有友以輔助之師友也者講學以脩德之賢也自古聖帝明王未有不由斯道以致治安者誠思法古帝王敬身脩德親賢勤學以敬天勤民則天心可格人和可協太平可致而福祿可保也大臣職專輔導師友之官也若不與大臣相接面商可否徒以揭帖進呈則精神終不流通事理終有阻碍何以作孚萬邦而感激天心自古及今未有是理古稱君臣相得如魚之得水魚不可一刻無水為人君者可數月半年不與

大臣一面語乎臣實狂愚謹據千慮一得之見列為五條
開具上聞伏惟俯賜省覽臣愚幸甚一曰定君志以
脩德業君道之大在乎知責任之難責任之難在君與相
古聖帝明王曰后克艱厥后臣克艱厥臣又曰為君難為
臣不易皆謂責任之難勝也為人君者豈天固縱之居萬
夫之上得以自恣其欲自肆其情哉天地神人是主
宗廟社稷是承其任甚大其責甚重也此所以難也知其
難則思所以圖之不可忽易古之知難者曰予臨兆民懍
乎朽索之馭六馬兢兢業業不敢荒寧曰惟稽古正學明
善惡之機辨忠邪之分曉然趨道之正在乎君志先定志

欲為聖帝則必法堯舜志欲為明主則必法禹湯文武
之臣者孰敢不敬故曰君志定而天下之治成矣此之謂
可久之德此之謂可大之業此之謂能稱君道矣伏惟
聖裁二曰畏天命以消災異人君為天下臣民之主所以
奉若天道也皇矣上帝臨下有赫君道盡則天命眷之君
道不盡則天命去之天命眷則天下臣民是依天命去則
天下臣民是畔此天之可畏也古聖帝明王曰我其夙夜
畏天之威于時保之然人君者天之所立也天心常仁愛
之君道盡則三光明四時順風雨時百穀成萬民安君道
不盡則天亦念之出災異以譴告之垂戒之欲其警惕而

修省之如堯之大水則曰泇水警予泇水者洪水也湯之
大旱則以六事自責今歲水災亦已非常在內則官民廬
舍倒塌在外則禾黍淹沒舟楫漂溺糧船損壞人民溺死
非小異也近報遼墻倒卸太多一時修築實難秋高虜狂
大可慮也不大警省改德徒曰修省天意不可回也必幡
然改念平日之所欲者不欲平日之所為者不為勤政親
賢去邪寡慾一言一動必就于正道則一念之誠上通于
天災異自消百祥來降矣伏惟 聖裁三曰敬大臣以尊
師道古之聖帝明王未有不由學而成者唐虞君臣更相
飭戒君臣自相師友也湯學于伊尹武丁學于甘盤太甲

成王學于伊尹周公皆學焉而後臣之宋程頤為崇政殿
說書必坐殿上而講後世不知此義但以崇高自大以威
嚴臨下不復知有尊師之禮師傅保之職三公之位也三
公坐而論道我祖宗朝優待三公之禮甚隆其於輔弼
之臣必稱先生不敢以官名不敢以名稱一則曰先生二
則曰先生每歷朝實錄可考也 仁宗以來未之有改也
先帝世宗皇帝初年於輔臣楊廷和等猶稱先生自後
一輩諂佞之臣進而後卑之矣夫故大臣者以大臣近已
也所以自敬也尊師傅者以師傅成己之德業也所以自
尊也不敬不尊則視之與羣臣等無有畏心何所警惕徒

以官秩崇之祿賜厚之是不足為敬為尊也要在敬之以
禮尊之以心迎之則喜送之若失遇之則親溫言霽色商
訂可否不徒以揭帖進呈如是則情意孚洽義理開明君
道盡而大業成矣伏惟 聖裁四曰擇左右以慎近習人
之所居莫大乎慎所與與治同道罔不與與亂同事罔不
亡故曰與君子居如入芝蘭之室久而不聞其香與之俱
化矣與小人居如入鮑魚之肆久而不聞其臭亦與之俱
化矣諺云近朱者赤近墨者黑此理易知也况 人主左
右諸欲易遂服用華侈聲色艷靡使令便辟善柔便佞充
滿前後其所言者無非蕩心之言所舉動者無非肆意之

事一日與居志念遂移風夜與處染習無辨古人戒之曰
不適聲色又曰遠耆德比頑童恒舞于宮酣歌于室徇于
貨色耽于音樂流于遊戲有一于此未或不亡故曰人君
一日之內接賢士大夫之時多親宦官宮妾之時少則所
以警省身心發紓志意德業廣心泰神怡樂莫大焉內
臣中謹慎小心知義理識大體者亦多其善柔便佞不少
選擇而使之尤為緊要即今秋涼宜親近儒臣日講不宜
暫罷伏惟 聖裁五曰勤朝政以勅臣工古人有言一日
之計在于寅一身之計在于勤故曰雞鳴而起雞鳴則寅
時也業精于勤勤則有功也自古聖帝明王必憂勤惕勵

一日二日萬幾不勤則荒惰宴安萬事隳矣傳曰大禹聖人乃惜寸陰至于衆人當惜分陰經曰克勤于邦又曰君子所其無逸我祖宗建無逸殿正訓以勤也常朝必于昧爽之時昧爽者晦明未辨之時也朝早則精神清爽志氣精明朝罷而退百官各有警惕得以修政立事非曰小補若於辰巳時朝則百官亦有年大者守候久而精神倦未免廢事習久則百官因循怠惰無怪乎政治之不古也
伏惟 聖裁

替愚衷以裨 聖治跡

王得春

竊惟聖哲之君應時而興必思明目達聰以廣維新之化
賢智之臣獲主而事尤宜披肝露膽以盡獻納之職此固
其相須之甚殷而相遇之不偶者也我 皇上嗣登 太
寶 朝宁改觀頒布 綸音海邦易聽即其直言無隱之
求真巍然中興之令主矣臣切受 簡書巡省兩浙未能
身遊 虞廷之盛而一念犬馬之微忠欲有所建明以為
更始新政之助者殆夙夜不遑以自寧也敢紬繹 詔款
遺意或上有關於 國體下有切於生民者條為八事開
列奏 聞雖塵埃之小知無補於萬仞之高而江海之深

又何擇於涓流之細況臣備員臺末既有當言之責而
皇上納諫若渴又有可言之時則亦何忍自甘緘默以速
曠廢之罪哉伏惟 詢謀不遺於狂瞽 燕聽旁及於蕘
蕘 留神采擇見諸施行庶一得之陋少有裨於 萬幾
其所以衍 宗社無疆之祚者亦在是矣

一曰正宮闈嘗聞漢匡衡曰妃匹之際生民之始萬福之
原蓋上以事 宗廟而下以繼後世是不可以不重也故
古者天子后立六宮三夫人九嬪二十七世婦八十一御
妻皆有所限制而不敢過匪惟遏逸慾之漸亦以養壽命
之本誠萬世之鑒戒也今 後宮之內老弱幽閑者不知

幾千百人陰氣鬱積怨望充盈有傷天地之和豈可不為之一處乎昔唐太祖踐祚聽中書舍人李百藥之言遣尚書左丞戴胄給事中杜正倫於掖庭西門前後簡出三千餘人至今傳為盛事況今皇上嗣經之初治法堯舜將陋夏觀之政於不足為者臣請勅下禮部早正以后之位以聽天下之內治更選良家女備充妃嬪之數其餘婦女若未經先帝御幸久禁官中者皆宜出之各歸親戚任求伉儷庶陽道常盛陰氣常微而所以順養聖躬消弭氛祲者此其大端矣伏乞聖裁

二曰重祀典嘗聞國之大事在祀祀之禮數隆殺異聖皇

變殊制凡典其事而當其職者必得人以任之則義又可
飭誠信可通由是 郊而格 帝 廟而饗 神胥此焉
出所謂惟賢者而後能盡祭之義者此也我 朝建官置
為太常寺職專祭祀原係正三品衙門則隆重之意槩可
見矣故天順成化時有以禮部尚書而掌寺事者宜興蔣
守約涿州郭景賢是也弘治正德時有以科甲名儒而居
寺職者濼州齊章崑山魏校是也豈嘗以異端雜品而濫
廁崇高之地慨然與公卿並駕齊驅者乎昔因 先帝祈
天永命建設齋醮故如師宗記者乃以黃冠羽士之流一
旦顯榮至此今奉 遺詔凡禳祀之舉盡行停止則官寺

不可廢而宗記實不可用也臣請勅下吏部將宗記退還本宮另選宿儒有德望者為之脩復祖宗之舊制永黜異教之匪人庶典三禮者皆寅直惟清之士必能盡志盡物以秩祭法以明祭義而相聖天子之明禋者其殆庶幾乎伏乞聖裁三曰惜名器嘗聞爵祿者天下之砥石帝王用之以彌世磨鈍者也故德懋懋官功懋懋賞夫以官賞而分功德則德之貴於功官之重於賞古人用意之微權衡之妙自有不容濫焉者矣惟英君詎辟寧損百萬之資而斬一卽之拜其意亦在此耳竊嘆工部尚書徐杲者迺執斧斤攻造作一匹役之至卑且賤者也縱令

其有雖妻之明公輸子之巧曾何係於國家之輕重哉
謂經營官殿勞苦而功高則優以厚賞亦云踰分矣顧
乃授之高官以崇其爵錫之異服以華其躬廕之世祿以
裕其後名器之濫至此已極識者每以為扼腕而興嗟也
臣請勅下吏部削去尚書之銜追奪飛魚之服放歸田
里姑與冠帶以終身其子孫之在卿寺及錦衣衛者盡從
罷斥仍編匠籍以供役用以後凡一技一藝之人不得曲
意逢迎希干寵祿亦不得非分遷擢汙穢衣裳庶官不及
私昵爵罔及惡德薰蕕不共器而居牛驥不同皂而牧
朝政肅清而四海之聞風必為翕然稱快矣伏乞聖裁

四曰禁諂諛嘗聞和氣致祥瑞乖氣致異固天之常道而開
祥則喜見災則惡亦人之恒情顧容悅之臣每藉祥瑞以
希寵榮好大之主多因祥瑞以誇功德臣嘗稽之往牒如
赤莖素蘘并柯共穗之類史不絕書而要之諂諛之風則
從此濫觴矣恭惟我朝開國卓越千古故大聖人之
所作為亦迥出常情萬萬也姑舉一二事言之洪武二年
陝西寶鷄縣進瑞麥一莖而二穗三穗五穗者甚衆

太祖曰朕為生民主惟思脩德致和以契天地之心使三
光平寒暑時五穀熟人民育為國家之瑞蓋不以物為瑞
也永樂六年福建布按二司奏言柘生花為瑞成祖曰

朕主宰天下于生民休戚未能周知故委任爾等鎮撫藩
方以圖安戢而乃肆志逸樂於軍民疾苦一毫不言今言
栢花為瑞夫時和歲豐物無疵厲百姓富足四夷順安此
國家之瑞也乃降 質書切責之大哉 王言有以仰見
二祖光明正大之心矣邇年以來獻瑞者不一而足凡形
諸表疏見諸歌誦者備極諛美之詞間有災異則多所忌
諱匿不以聞甚非所以憂 治世而危 明主也今 皇
上當履端正始之時不可不防其漸臣請 勅下禮部通
行曉諭中外臣工毋得仍蹈前愆以消邪佞之風以養直
諒之氣凡四方或有水旱疾疫之災寇賊姦宄之變不時

據實報聞使可以知戒懼而備修省庶 皇上敬 天勤
民與 二祖同其盛而諸臣思言讜論亦與魏相同其休
矣伏乞 聖裁五曰慎題覆夫中外臣工身任官守言責
之寄者孰不懷忠悃竭誠敷陳時政思各建白以自獻
於 上然甲可乙否見多矛盾彼是此非言有同異故下
之該部議以覆請於 天子 天子可其奏而降有 明
旨則當堅如金石信如四時期於永世之必行此實尊
君命重 王言之大義也但前此六卿擔當任怨者固多
獨斷之猷而依阿詭隨者未免徇人之見每至言官論事
奉 旨依擬之時委曲遷就漫無定主不曰誠如言官所

論則曰與本部查訪相同使如綸之言 渙汗之號玩
若民間之常語多致廢格不加遵守此豈可以為訓乎臣
請 勅下各部今後遇有諸臣章疏務秉公詳看持衡審
酌是者直以為是即與奏行可也非者直以為非即與論
罷可也蓋苟可以同固不容於立異苟可以異亦不必於
尚同協輿論以裨 國是又何嫌疑計較之有哉若建言
者不顧 國家大體仍撫拾以沽忠題覆者不論事理當
否仍阿比以混上許科道官互相糾劾庶乎大臣秉執持
之義則庶官懷畏忌之心是惟不言言必可見諸施行而
聖旨之所頒布莫不世世天下法矣寧復有壅逆之患哉

伏乞 聖裁六曰清輸納臣伏讀 新詔欸開 內府各衙門供應錢糧欲加意節省以免徵派之煩又欲差風力科道官清查以稽侵漁之弊累年積蠹一旦振刷此真盛治之事 太平之象也臣以為積弊固在於清查而善治莫先於法 祖蓋 祖宗立法至精至密惟行之久而廢墜則弊斯作焉所望以修舉之者寧不在於 今日乎嘗聞成化以前糧長解戶上納白糧及各料物戶工二部委官同科道驗收運送 內府糧長解戶不與內臣等見面故軍校不得脇勒內臣不得多取小民亦不致虧害及弘治以後部官避嫌各欸糧料不肯驗收俱令小民運送

內府以故內臣軍校視此車為奇貨多方刁指百計需求有白糧一石加至二三石乃能上納各項料物倍出三四百兩始得批迴糧解之人費踰常數不得不稱貸陪納輕則蕩產重則喪身雖有禁例誰敢與內臣抗衡雖切號訴無由向九重上達其困抑苦楚之狀不可勝言斯民一蒙是役殆將與死為隣矣且積習既久盤結已深彼視魚肉平民若秦越也而司國計者獨忍其陷於危亡而不拯援之哉臣請勅下該部查成化年間事例將承永庫及各監各局等衙門川係上供錢糧或添設科道二員或將巡視光祿寺下庫科道就便兼攝如遇糧長解糧料

至京者徑赴該部與科道官處投文掛號聽部委官會同
驗收運送 內府收貯各該內臣止許司鎖鑰紀出納並
不得與民見面肆行索詐仍每月終科道官將一月內舊
管新收開除實在各數目查算明白備造揭帖進呈

御覽庶乎茲弊可祛財力可省而 祖宗之法度可復

更始之治功可成矣然非 皇上大奮 乾剛毅然獨斷

恐令未下而阻撓之計百出雖有良法美意其何以行之

哉伏乞 聖裁七曰慎貢選夫建官惟賢位事惟能故網

羅天下雋傑以布列於庶位者惟貴得其人而已不必拘

拘于資格之限也近奉 新詔以舉人絕望于九卿歲貢

不得為方面 首諭吏部毋拘三途大哉 皇上所以飭
吏治作士風者信莫諭於此矣但舉人之中年資壯茂志
向高遠者儘有其人久緣在上者期待甚輕遂消阻自棄
今遇 聖主旁招俊乂破格超擢必有個儻非常之才奮
發而興起者矣至於貢行非敢謂其獨劣也蓋緣埋沉歲
月壯心已墮雖欲建功立業恒苦平日暮途窮此所以終
難於策勵耳臣請 勅下該部查覆先年選貢之例每歲
於正貢並行然行選貢又先於慎選提學但有員缺必多
方博訪不分內外拔其華實並茂而非徒以道學欺世盜
名者簡居是任諭令校士之時不以一毫徇已徇人之私

得以參乎其間惟取其年力之強健也行誼之雅飭也學術之純正也儀度之端嚴也然後舉而非之於國及試之
大廷果能無此四長則從而奮庸之否者先黜其人仍查係某提學所取亦坐以不明不公之罪庶幾貢薦之士皆得以及時甄錄賢能並征可以備三途之用可以預兩司之擢而浚明亮采之事功亦從此致矣伏乞 聖裁
八曰恤災傷竊惟淮安徐沛乃 國家根本之地而鳳泗州又 祖宗陵寢之區則所以緝寧底定之者比之他郡縣尤當加意焉臣去歲出差南來道經彼地見其水患異常室廬漂沒田野荒蕪百姓流離嗷嗷待哺之狀誠有不

忍言者矣況加以開濬新河工役繁興勞億益甚今雖竣
事而民之瘡痍未復寒無以衣饑無以食其屯住山嶺者
亦無以居皆眇眇相視聞欲嘯起而為盜固理勢之所必
至也夫樹藝者培其方長非難而甦其枯槁為難業醫者
已其疾病非難而甦其膏肓為難其在乎今民方枯槁而
疾入膏肓矣所以回生而起死者若非大加賑恤其何以
濟乎查得嘉靖三十二年正月內先帝念淮徐等處之
遭水患而不忍斯民之陷於危亡也特允輔臣所請
專差刑部左侍郎吳鵬前往被災地方動支徐淮二倉米
麥四萬石運使餘糧銀五萬兩及各府州縣無礙庫銀與

預備倉糧相兼支給一時百萬蒼生賴以全活而他變亦因之不作臣請勅下戶部體照癸丑年事例擇遣大臣一員詣彼經畫賑調以宣德意以布仁澤或止令彼處總理河道及總督漕運衙門就便分理優恤以救燃眉之急庶乎民皆懷感恩服而邦本可固寇亂可弭矣至於天下但有被災殘破地方并乞即與推廣一視同仁此又聖明如天浩蕩之恩聯屬人心之至計也伏乞

聖裁

勤初政以保 天命疏

魏時亮

本月初七日該鴻臚寺傳示免 朝一日至十一日復示
免 朝大小臣民咸謂我 皇上初政甫及一旬免 朝
至再臣獨以為 皇上時衰未釋耳今當抑哀除服之
日必將勤政事近儒臣悅聖學親經史者不但 御門已
也顧初政一事即繫人心稍有怠忽無以慰百姓延頸想
望太平之心慰百官滌慮思承 德化之意人心所在
天命所繫臣敢不為 陛下悉陳之恭惟 陛下 天地
宗廟之主百官政事之主億萬生靈命脉之主九夷八蠻
歸向之主也 陛下之勤怠關係匪細而初政之敬忽人

心屬望尤匪細者昔帝舜初政詢岳闢門明目達聰武王
踐祚訪於箕子成王除服訪於群臣古之聖帝明王堯舜
汲汲於初政者類如此 陛下勤於此焉即將舉於堯舜
之隆躋於三代之上廼今 問學問政之勤懇未著而
御門奏事之傳免再申豈人心之所望於今日者哉蓋今
日之天下百姓窮困已極四方盜賊甚多 國家元氣耗
竭夷狄窺伺甚密中外拭目挽回者 陛下之親賢勤政
耳 陛下一加意焉甚非難事甚不勞者若稍稍怠忽則
天下之元氣豈可以再壞哉有諠於 陛下者必曰 先
帝數十餘年不 朝今教習日暫免何害此最非忠愛

陛下以慰人心保 天命者所當立斥者也蓋 先帝初
年日勤政事日御 經筵納諫甚多親賢無倦崇敬一之
學聞事心之旨數十年後方始厭 朝然 先帝明於親
輔臣凡身之疾痛事之大小悉問之剛於制近習凡要緊
章奏疊置前列雖不要緊者不敢以滋壅蔽斷於去姦邪
凡中官姦臣素雖信愛一覺便斥夫 君德最莫先於剛
明英斷者而猶不免因 朝政之廢遂致海內之虛 遺
詔所謂蓋愆成美端在 陛下則 陛下明斷英烈悉邁
先帝即他年 萬壽日隆尤不可息况今尚在 先帝初
年勤政之時天下望治之日而可息乎昔周宣王初嘗晏

起矣後因姜后脫簪之請遂翫然早朝晏罷以成中興今
主夫一宣王也晏起幾失人心早朝遂成賢主孰謂朝
政之可怠哉若陛下以朝政為勞精神稍覺不勝臣
請先言攝養精神之畧陛下將有不勞而治者夫儒臣
經史保精神之良藥也宴安近倖戕精神之醜毒也自古
致治之君未有不親經史儒臣者而傷生害治之君未有
不由宴安近倖者顧明王之自擇何如耳若陛下以
御門稍覺虛文懇乞斷然力行科臣所請并開經筵
日親經史儒臣朗誦問答務講求保愛精神養心致治之
法退居乾清早晚尤以尚書并大學衍義娛目養心或

以少并左右端坐疑神儼對越上帝務希減幸御後
之期則陛下精神日強將萬萬年無疆惟壽豈但
朝政不勞而已哉陛下盛德大業於此日將隆矣先臣
王守仁所謂養德養身只是一事非虛語也若陛下應
有免朝之日直示臣下某日暫以某事免朝若陛下
出御太早舉難以宜欽定日出為度昔周政不綱而視
朝無一定之限或太早或失遲暮詩人諷之曰折柳樊圃
狂夫瞿瞿不能晨夜不夙則暮蓋言狂夫尚不敢越折柳
之限而人君何可越日出之限哉是故一有定限則陛
下慣習將自有不覺其勞者矣矧陛下聰明仁儉中外

傾仰有年茲必不以朝政為勞而恒以宴安近倖為戒臣
固謂陛下下一釋服抑哀之後未有不勵政事近儒臣悅
聖學親經史者也伏乞陛下鑒近日之免朝知臣民
之屬望拳拳惟天下太平為念惟聖體保愛為心體
天之行健以御門御便殿御經筵勤政勤學為
聖功奮天之乾剛以讀書靜坐養心不溺於宴安近倖
為聖德體天之光明下濟以納諫諍辨賢邪慎賞罰
真意流通於臣下為聖治此只在陛下斷然有為不
時召見咨訪若古之聖帝明王之兢兢汲汲者則百官政
事可以允釐四海生靈可以永安九夷八蠻可皆歸化而

天地宗廟之付託可永保於萬萬矣

獻愚忠思裨聖政疏

管律

臣謹按三代每歲孟春適人以木鐸拘於路官師相規工
執藝事以諫其或不恭邦有常刑緣古無專諫之官故乘
時布令以速天下之言俾民隱上達王化旁通是以治隆
俗美良有由然今陛下負堯舜之資居堯舜之位任喉
舌以公卿寄耳目以臺諫委腹心以近貴託藩屏以世勲
恭儉求治於今五年夫何海內多屯平康未覩臣仰窺

陛下必有勤於宵旰而未暇逸也蓋比者陛下以大禮
未定世廟未成無申純孝之心固不遑他務茲者大
禮定世廟成純孝之心盡矣當此歲運更新之初正乃

順序為政之際臣濫冒言官既有瞽說不忍堅守口之戒
不為 陛下獻焉臣聞為治有術要在擇人故伏羲畫卦
以內君子外小人為太以內小人外君子為否故曰太曰
否係乎人之賢否關乎 國之盛衰歷漢唐宋之興替未
有不出乎此者臣願 陛下謹於任用務量才度德勿昵
匪人博訪旁求勿循近嬖如此則 尊德庇民捷於影響
嘉靖之治有不蔚然而興者臣豈信之乎臣又聞天地閉
而萬物否上下交而德業成是以政事之興蓋本于君臣
之協也君臣不協則上猜下忌縉紳有識之徒必懷巖穴
長往之思夫百揆庶務誰與輔之故曰同寅協恭和衷說

臣頃陛下推公愛以體群情察厚誣以防讒間如此則
精白敬應捷於影響嘉靖之治有不蔚然而興者臣豈
之乎臣又聞國之綱紀存乎賞罰聖帝明王賞不避仇
行自近故曰人主御天下貴無私也蓋私則啓驕驕則強
強則橫橫則不可制矣是豈社稷之福臣頃陛下賞
功勿使濫于廝養罰罪勿使脫於苞苴如此則趨善遠惡
捷於影響嘉靖之治有不蔚然而興者臣豈信之乎臣又
聞王言惟作命發乎邇而見乎遠四夷之所觀望萬姓之
所信從出其言善則千里之外應之故曰一言以利天下
其機如此可不謹歟臣頃陛下於批荅之間亮事情之

可否審關係之重輕務詞與事宜事與理合如此則率作
與事捷於影響嘉靖之治有不蔚然而興者臣豈信之乎
臣又聞后從諫則聖蓋人君一身獨任天下之責深居九
重之中民情世事易於壅蔽故曰匹夫匹婦不獲自盡人
主因與成厥功是以方今之制封駁章奏舉正欺弊責
之給事中激濁揚清肅僚員度責之監察御史祖宗以
來惟恐諫官依違乖職故常叮嚀諭之臣願陛下虛懷
納聽隱其短而用其長原其狂而亮其直如此則輸誠布
忱盡人之心言清之治有不蔚然而興者臣豈信之乎臣

盡心以事陛下者唯

上於變舜能之故萬邦作

又禹能之豈不朕行湯武能之故兆民允殖四海永清
今之望 陛下三三帝四三王使中興之業增多於
太祖高皇帝開創之積者中外華夷同是心而罔間也
陛下豈肯自遜之乎如臣言可采乞於 萬機之暇 賜
時夜之思融會 聖心而達之政事可也如且委以該衙
門知道固非臣寸草之心矣

因事納忠以清化源裕 國用事

傳孟春

臣聞天下之化始於閭門人君之結綬成於 恭儉故虞舜克諧二女必先於民財之阜成湯不適聲色尤謹乎貨利之殖古之聖帝明王所以維持國本宣暢化猷而綿雍熙之業者端不外是仰惟 皇上膺寶天縱 洞察理欲之幾 儉德性成克慎奢靡之習天下臣民莫不引領傾心日望 治化之成本月丁一日禮部接出 聖諭祖宗之制宮中設六尚皆預教以讀書使稍知禮法茲已缺少著照例選民間女子年十一歲以上十六歲以下者三百人進禮部知道欽此欽遵夫六尚之員既缺則選納之制當

聖陛下乃於從立之後方為此舉是誠動中興禮監昭
盛德之至部臣仰體 德意亦既遴選以進夫供役于內
數百人足矣使新者既入而舊者不少矜及竊恐滿閉之
思上千和氣女謁之盛適召災殄非所以增 宮闈之福
也如蒙 勅下各官量減二百移其廢費以養今日之所
追者庶乎人不必加而使令足費不必增而財用裕一以
消怨曠之氣一以省 宮掖之費所以凝天和而延百福
者端在是矣本月十八日續該戶部揀出 聖諭取銀三
千五百兩

聖下富有四海則府庫之財皆陛下

五 以方之財以輸戶部竭

戶部之財以輸各邊計歲用之缺乏者百六十萬是財用之不足莫有甚於此時者也今日一朝而取三十萬兩臣恐不知其將安用之縱令事合給用亦乞勅下該部量入為出不必取入 宮中以增 內帑之冗耗昔 太祖謂宋濂曰自古賢哲之君知天下之難保也遠聲色去奢靡以圖天下之安是以 天命眷顧久而不厭明明

祖訓真萬世之龜鑑臣仰窺 聖德仁明恭儉固能恪遵祖訓但恐左右之人或以聲色貨利欺諛希寵者伏乞皇上勉崇儉德益敦化源 念宮政之當飭下之禮部卜

吉戒期還 皇后於宮中以禮除教以為六 官之表

率或新選既備舊役有餘乞 降詔旨稍令減放以遂物

性思財用之當節下之戶部核其舊額出入之數與今昔

盈縮之由釐為會計實錄 上座 宸覽廣集群議講求

其理財之要以紓 國計之繇遇有經費悉下戶部出納

不必取而用之以滋冗靡庶 宮壺之化以肅而協氣流

通出納之數可稽而取用有節將媲美帝舜遵德商湯不

難矣

受言崇儉以光聖德隆治安疏 王時舉

臣近觀邸報吏部一本恭遇太祀感激愚衷敬獻祈

天永命十劄備 虞採飭臣工以降萬世治安事覆戶科

都給事中魏時亮等奏原任給事中石星遇缺推用奉

聖旨石星如何起用姑且都不究戶科都給事中魏時亮

等一本懇乞 聖明仰崇節儉憫恤民窮事內奏停買珍

珠寶石奉 聖旨庫內缺珍寶着戶部買此來進用如何

這等說姑不究該衙門知道欽此臣竊惟寶忠直者治之

機 皇上則放逐之雖言官薦之而不從寶珠王者治之

蠹 皇上則好樂之雖言官諫之而不止是一念之好惡

雖微而關乎世道之隆污者甚大一時之從違雖輕而垂乎萬世之勸戒者甚重臣待罪言官惡得無論臣嘗觀唐太宗退朝謂長孫后曰魏徵每廷辱我后退具朝服賀曰妾聞主明臣直今魏徵直由陛下之明故也太宗說之夫以太宗勉勉納諫晚年猶有廷辱之疑賴賢后之言而悟甚矣受言之難也皇上臨御之初召用建言諸臣歿者則恤錄之度越太宗遠矣乃今獨不容直臣之諫豈不欲以明主自居乎臣知皇上必不為也又觀唐玄宗初年以風俗侈靡其珠玉錦綉焚於殿前后妃以下皆毋得服珠玉錦綉及後在位日久用度日侈後官賞賜無節焉

夫以玄宗能自刻勵晚節猶以奢敗識者謂之鮮克有終
甚矣崇儉之難也 皇上登極之詔凡織造採買悉皆停
罷超越玄宗遠矣今乃獨不能禁珠寶之進豈不欲以節
儉自勵乎臣知 皇上必不為也又觀戰國時齊威王魏
惠王會出於郊惠王曰寡人國雖小有徑寸之珠照車前
後各十二乘者十枚豈以齊大國而無寶乎威王曰寡人
之所以為寶者與王異有四臣者將照千里豈特十二乘
哉惠王有慚色夫威王乃戰國中材之主猶知所寶在此
而不在彼况 皇上天縱之聖登三邁五顧肯居齊威之
下哉臣又知 皇上必不為也夫此三者皆 皇上之所

必不為乃今言官薦之而不從諫之而不止者臣知其故
矣皇上之意豈不以為人臣食君之祿不當言君之過
吾以至尊之威雖盡箝天下之口無不可者殊不知君不
自明兼聽則明亦不自暗偏聽則暗故古之人君設誹謗
之木置敢諫之鼓樹進善之旌導而求諫用其言而顯其
身猶恐其人之不言而過失之未聞也况震之以威乎今
皇上之所遜者不過石星一人而已不足慮也然在朝
之臣鑒石星之轍而以言為諱者所當慮也脂韋之習既
勝骨鯁之氣潛消甚至大臣持祿而不敢諫小臣畏罪而
不敢言其為壅蔽之患不既深乎皇上之意又以為人

君以一人治天下當以天下奉一人吾以四海之富鉅書
致天下之珍無不可者殊不知作法於儉猶恐其奢作法
於奢何以示後故古之人君捐金於山投璧於谷沉珠於
淵惡衣菲食敦朴以為天下先猶恐其令之不從而淳風
之或漓况導之以侈乎今皇上之所好者不過珍寶之
微而已不足戒也然天下之人從皇上之好而以侈相
尚者所當戒也競靡之念咸彰黷貨之風愈熾甚至卿大
夫皆徇利以寶家士庶人皆徇利以寶身其啓交征之患
不既大乎臣故曰關治道之隆污垂萬世之勸戒者此也
伏望 皇上恢張 聖德俯採狂言察石星陸鳳儀等言

雖逆耳心則效忠誠為主璋之器亟行起用以復其官思
珍珠寶石等寒不可衣饑不可食徒為美觀之具亟行停
買以杜其侈庶言路開而善道日闢儉德崇而淳化益隆
矣

諫止聖躬脩養

楊最

八月十二日該禮部捧到 聖諭內云東宮權命監國重
人仍奏請朕少解一二年調養或可親政悉若初不敢又
取逸耳欽此凡在廷大小文武臣工聞之莫不驚駭 聖
諭何為一至此哉揆厥所由 陛下不過得一方外之士
欲假調攝脩養耳且古之聖帝明王未有過于堯舜禹湯
文武也 陛下所欲取法者亦未有外于堯舜禹湯文
武也堯舜禹湯文武之德之功業見于經載于史昭然可
考未有欲 東宮監國而自托脩養者也堯舜既不肯為
禹湯文武亦無所事 陛下何必為此哉堯舜性之也非

不知脩養可以為仙禹湯文武身之也亦非不知鍊道可
以成佛數聖人雖知之不可易而學之不可易而學不可
易而得也不易得所以不學豈謂堯舜之世無仙人堯舜
之知不能學仙哉有學仙之術有成仙之人大段所居之
地不同所理之事亦異耳 皇宮內院豈有白日昇天者
哉昔孔子嘗遇老子問禮出謂弟子曰今見老子其猶龍
乎龍即仙也孔子非不知老子之為仙不可學也不可學
豈可得哉臣待罪僕馬之門傳聞 皇上之諭始則驚而
駭繼則感而悲叨列群臣之末豈可默而無言犬馬之誠
有如周昌期期下敢奉詔伏望 皇上端拱清穆恭默思

道以純心契 天心以孝念格玄念一日二日萬幾雖勞
目力以處分不費精神以調攝不適聲色保復元陽不求
仙而自仙不希壽而自萬有千歲矣黃白之術金丹之藥
皆不脈而用者恐傷元氣本性此臣所謂所居之地所理
之事不同正謂此耳至于監國事體重大臣尤不敢議自
有五六大臣并九卿科道主議況 陛下神武聰明自有
定裁臣今止云三代以上至于漢唐宋諸君不惟不足法
且不暇及言耳 九重之暇肯一留意焉庶杞人之憂或
可備韋弦一少助云臣昧死冒言不勝戰栗恐懼之至

從儉納言嚴法紀跡

周弘祖

昨觀邸報偶 皇上有收買珍珠寶石之諭隨該都給事中魏時亮監察御史賀一桂各奏乞 恩停止但未蒙 賜允臣嘗聞舜造漆器而群臣諫者十餘人武王受紂而召公反覆數十言於貴德賤貨之辯天命去留人心向背之機尤拳拳焉夫舜聖人也武王亦聖人也漆器微物也受紂細行也而集諫至數十人數十言者豈虞周之臣事此神聖之君當此細微之事不知將順德意而顧為此晚曉哉良以忽小者累大輕始者鮮終故明王慎德必謹於微而忠臣愛君常防其漸我 皇上嗣統以來 恭儉之

德見之躬行播之詔令不一而足此天下所共見共聞也豈宜有是臣意茲諭偶皇上慮未及此決非

聖心之所安也敢冒昧再為皇上言之夫錦繡絺綺奇珍玩麗自古目為迷心之醜毒比為伐國之斧斤矧茲珠寶糞不可衣飢不可食在天地間尤為無用之物而價置之騰踊採辦之艱辛甚至一粒一顆可當中人數家之產陛下亦安忍以數萬家之產而易此無用之物哉昔堯舜之世投珠抵璧下至漢文所幸慎夫人衣不曳地後宮無珠玉之飾宋太祖戒宮中用翠羽皇上盛德配舜罔克即漢文且羞言之又何有於宋太祖乎此區區太馬

之心所以繼二臣而不能已於言也然臣之此言道其常
耳而臣之迂腐如此尤抱隱憂焉珍珠產於嶺表寶石出
自滇南他無有也今雖諭戶部收買然戶部必取辦於
商人須轉賣於二省今之二省豈昔之二省比哉嶺表自
張璉造逆以來一里蕭條居民半盜昨者會一本揚帆直
指徑逼廣城大將俞大猷閉關自守坐視其焚劫殺掠十
八餘日飽載而歸及賊去已遠有把總者復斬平民一家
七首以充賊級僅餘一子奔訴大猷又杖而殺之即其在
省城且然其他孤遠郡邑村落鄉井可知矣滇南自鳳繼
祖倡亂之後民瘼自瘁臣節自驕歸母嫂於留都前後

題奉 明旨 欽依無下十數沐朝弼視為故紙若罔聞
知即遐方殊域奉絲綸隻字無不風行雷動會謂中上世
臣而偃蹇抗拒如此耶即其敢於慢 君如此其他克殘
淫害斬芟小民可知矣夫以此愁苦思亂之民朝不保夕
又奚暇為珠寶之求哉兩地之採取既希則商人之轉販
亦寡戶部將何從得哉縱有得亦必重貲購求於豪富勲
戚之門臣不知其凡費積幾何也豈不甚可惜哉伏乞
皇上念茲民貧財盡之日正節用愛人之時不作無益害
有益不貴異物賤用物將前項收買 成命 特賜報罷
若俞大猷之狡猾躲閃玩寇殃民沐朝弼之狼心跋扈罪

狀尤著均乞大奮乾剛齊以國法則民命全而邦本固臣紀肅將皇威丕著矣臣干冒天嚴無任戰慄待命之至

躬節儉以承上天以恤下民疏

嚴用和

臣等近見浙江南直隸撫按等官各題稱杭嘉湖及蘇松常鎮等府水災異常風潮大作田禾盡行淹沒人口悉被漂流積骸盈川橫屍遍野其有僅獲生存者又皆身棲無所露體沾泥口食無資待哺枵腹扶攜流徙之狀見者心寒愁苦悲號之聲聞之額蹙即其受災深重較諸淮陽徐邳山東河南真保等處大率不殊夫國家財賦全取給於東南茲財賦所出之地供輸有常之民遭此數十年未有之澤水我皇上以父母天地為王道一夫不獲視猶如傷矧東南億萬赤子淪胥以亡可立而待寧忍置之度

外 德澤略不少施則夫 敦節儉之政俾浙直群黎尚
得解倒懸而延殘喘者詎非 恤災傷固邦本第一義乎
欲 敦節儉宜從 服御裁靡費如今蘇杭織造南京供
應機房織造原非係 祖宗額設其所需一絲一縷皆取
諸民間而用之者也小民當年穀順成熟不樂於惟正之
供偶值水潦凶荒此惟救死而恐不贍正我 皇上宵衣
旰食殷憂民隱之時雖 發帑濟饑破格寬貸猶恐不足
以拯民於危溺也然且布 蠲賑之仁言鮮衣被之實政
錦繡文綺競奇巧於機張金彩雲霞貴輝煌於杼軸匠役
廩餼之給顏料採辦之征民不堪命未免傾產蕩資以應

賦竭繭絲取浚膏血東南垂斃之民何忍使至於此極乎
是以巡撫浙江都御史谷中虛則揭稱額徵歲造段疋銀
兩其勢難以徵辦合無傳免浙江布政司叅政王世貞則
奏稱地顆粒無收有秋絕望欲將一應顏料加派織造等
項悉暫停革巡按直隸監察御史張問明則題稱 國家
上供之需將無所出欲差緩諸征以為救時之圖南京工
部尚書林雲同則因供應機房錢糧無處至欲引疾求去
南京刑科給事中駱問禮則奏稱江南水災尤為異常欲
停止供應機房織造無非目擊時艱效忠 陛下期為
社稷固萬年之業浙直活萬姓之生是以交章題奏相繼

陳請大有見於時勢艱難不得不如此爾先儒董子謂
天心仁愛人君乃先出災異以遣告之今河決海嘯雨水
為災實上天仁愛所在也仰承之策寔容緩圖昔成湯
表正萬邦必先子惠困窮茲民溺水於昏墊可虞其為窮
困極矣俯恤所加豈曰無要伏願 皇上欽崇 天道
體察民瘼紹 成祖不進浣濯之良規循 仁宗念民減
織之家法 特發 勅旨將蘇杭織造太監李祐南京供
應機房織造太監趙玠行取回京其已經織完者責令作
速親自齎赴交納其見織未就者伏乞 勅下工部移文
蘇杭各該撫按及南京工部委官如法織造遇有織完

續解進至於物料缺乏工緒未起者俱行停止免織以
官捕皇上軫念東南至意此後遇時歲豐稔民困少甦
之日先今所織取用有餘仍望務從省約免行傳奉織
造藏富於民知或服御所供不可已者並乞勅行蘇
杭各該撫按及南京工部遵奉頒去花樣顏色丈尺寸
數目任於各織染局內委官織造完備不必專差監臣前
往提督徒增地方勞擾且於從極簡詔有違其一應應
該蠲賑事宜併乞勅下該部議杭嘉湖蘇松常鎮
被災分數或將蠲賑米量與改折或將以前帶徵
錢糧悉為豁免或將該年額辦官銀候豐歲蠲徵或將蘇

抗船商稅課兩折運司私鹽及新開事例應解贓罰等項
銀兩多寡不等留備賑貸如兵餉不敷亦於此通融處給
毋泥故常議擬停當即便題覆請 旨移文各該撫按查
照動支務在救災恤患弭盜安民通候下年秋成之後逐
項徵銀補還照舊起解不缺如此則浙直民庶雖未蒙
發內帑之銀留轉漕之粟獲慰目前饑饉然蠲免多方荒
歉有賴咸知 皇上愛民一念直至省在躬之服御惠
遠地之蒼生視夫夏禹惡衣而克儉於家周文王憂而懷保
於邦者同一揆矣其與徐邈以北寧不同此感戴祝願之
誠我臣等下情無任激切祈望之至

順天道以裕養元躬疏

舒化

夫人心天地相為流通天地陰陽有剝復之機人心陰陽亦有剝復之機天地所以長久者以陰陽始復由微而著循環不已無有悖戾此所以亘萬古而不磨人君有參贊化育之大權有裁成天地之重任是造化消息之機恒寄託於一身則夫安養微陽以成至健之體者誠不可不知預養之道也恭惟我 陛下承乾履坤 受符握命以郊祀則盡敬事 天敬矣以 視朝則不輟治民勤矣敬勤交脩是 陛下之神即 天地之神 陛下之氣即 天地之氣更由此而充養之有不常安且寧乎惟今 冬

至之期乃一陽之候天地元陽於此時而復人身元陽亦
於此時而復其機至微易於傷耗存之則為性命之根耗
之則為情欲之感故存養之道以清心為本以寡欲為要
心清則欲自不動欲寡則真氣自回凡有尺寸之軀者皆
宜愛養况 陛下為 天子之貴萬民之 主法 天以
自愛者可少緩乎昨觀 聖駕臨郊 御輦尊嚴 秉容
端肅道傍之人無不懽呼鼓舞願 陛下萬萬歲為太平
天子况 臣等備員侍 御時依 日月之光分則 君
臣恩猶父子豈不欲 陛下常保安寧以席 履載之德
於無窮也哉但 臣等日侍 左右瞻候 天顏視朝祀

郊微聞有寒咳之聲是皆元氣未充調燮未至使然則夫
乘茲陽動之機以勤保安之道尤不可不切切也伏乞我
陛下審此天地之機求諸身心之內愛惜微陽勤
加珍攝凡一切情欲之私有妨害此心者必知其害而遠
之使一點微陽之氣寧靜於中然後能由微而至著由一
而至純則陛下之精神與天地之精神相為清寧精
神既完性情自暢隨處俱是樂地豈一切聲色懽娛耳目
者可彷彿萬一耶臣實冒昧芹曝以獻倘得陛下鑒
茲蕩蕩行之日用則悠久無疆之福與天地而同其永
長群工萬姓實不勝踴躍之至

崇實政以光聖化疏

王之垣

臣竊惟及時圖治者 人君經理之弘猷也際時陳愚者
人臣効忠之大義也茲者恭遇我 皇上隆慶之二年
履端伊始中外人心莫不欣躍鼓舞以為幸生 聖明之
世而冀見德化之成臣愚切念我 皇上向在諒陰之時
諸凡政務或行之而猶有未盡或言之而猶有未行天下
臣民固得仰窺我 皇上孝念之切施為弗遑也茲既日
月云邁 聖孝漸紓正我 皇上總攬 乾綱勵精 宵
旰之際也然 帝王之政務其大不務其細貴其實不貴
其文臣待罪該科不敢以瑣細繁文冒瀆 宸嚴惟以

朝廷之大政望 聖明以崇實事不越於 舊章志期收
乎 新益伏惟我 皇上省覽焉一曰 臨御崇親政之
實臣惟自古聖帝明王未有不親裁庶政而能興致太平
者我 太祖高皇帝臨御之時百官有奏事之例 成祖
文皇帝令六部及近侍官有事當商略者皆於晚朝陳奏
祖宗親政如此萬世所當法也我 皇上即位以來
御門聽政復 祖宗視朝之典矣但各衙門奏事或拘定
起數或泥於舊套瑣細事情煩瀆 聖聽 面奏雖殷治
理何裨臣謂宜通政司凡天下章疏惟有關 朝廷大體
者 奏其略節請自 上裁其各衙門若有軍國重務緊

要事情除先期具奏外許面陳所奏如已經御覽
即以御批傳示如未經御覽我皇上退朝之後
留神詳覽施行其一應尋常題奏仍遵舊規茲則
朝廷大政洞徹淵衷奏事非虛文御門有實政二曰
講筵崇啓沃之實臣惟君心為萬化之原而講學為養
心之要然非靜專則義理不入非常久則涵泳不熟我
太祖高皇帝開禮賢館與宋濂劉基輩日相講論我
孝宗敬皇帝嘗索太極圖西銘等書於宮中玩之祖宗
務學之勤如此萬世所當法也我皇上即位之初首
開經筵虛心聽講繪音賜宴大小臣工莫不懽

頌誠一時之盛典也後以天暑免講自十月十一月十二
月至今年正月夫一歲之月免其太半一月之日或風雨
則免或政有妨則免闕畧如是欲望聖學之成未也茲
時三陽開泰萬象融和臣願我皇上早開經筵
嗣後非大寒暑勿遽免講庶諸臣納誨有常聖學緝熙
無間所以培養聖德者在是所以總裁萬幾者在是
講筵非虛文啓沃有實效矣三曰召諭崇延訪之實臣
仰見我皇上以實邊召大臣以錢法召大臣諭
閣臣以防虜集議諭部臣以覲臣錢糧諸凡召諭
不一而是我皇上留心時政誠宗社生靈之福也但

賜召者請 門承 旨賜諭者且疏復 命我 皇上
德意甚美而諸臣仰荅尚覺間隔猶不若 祖宗時召諭
輔臣直至 御前從容問對之為詳且盡也向者言官屢
疏請我 皇上幸御 便殿咨詢治道俱蒙 溫旨俞允
尚未施行臣意我 皇上以山陵甫畢羨塋在念有所不
暇及耳茲者時當 天地交泰之際又值我 皇上訪落
群臣之期伏乞修舉 祖宗舊典時 御便殿或 召內
閣六卿或 召四朝群牧 賜以溫顏 俯垂清問凡臣
工之忠邪生民之休戚邊方之利病時政之興革諸臣必
有能披瀝忠懇為我 皇上言者矣夫 君臣協慮共濟

時艱興致太平傳之天下垂之萬世謂我皇上為堯舜
之君斯世為唐虞之世豈不盛美哉四曰聽言崇納諫
之實臣聞進諫非難聽諫為難聽諫非難從諫為難我
皇上即位之初明詔許諸人直言無隱一時臣工黎庶
獻納條陳俱荷溫旨中外相傳莫不頌我皇上為仁
明之主也往者一二言官不識忌諱致蒙聖譴夫我
皇上方以直言為忠言官顧以進言獲罪臣恐不惟懷忠
告者生疑畏且非陛下納諫之初心矣我皇上之尊
天也我皇上之威雷霆也自非有忠愛之心者孰敢進
一言哉臣願我皇上廣日月之明弘覆載之量凡

言論奏即便言過激切事未詳妥亦宜 俯賜優容以
廣言路若有言能中理事吏的確尤宜即 賜允納施行
庶言官樂盡其忠實政大有裨益矣臣質本庸劣學復疎
淺具陳四事深懼不足仰報 聖明萬一然大馬愚忠不
能緘默伏願 皇上留神採納天下幸甚臣愚幸甚冒瀆
天嚴無任戰慄祈懇之至

勸志聽言以端化本疏

鄭慶雲

竊惟人君以求言為職臣子以進言為忠是故臣子言焉人君採而行焉斯固君之明也亦臣之願也夫人臣之所以蹇蹇為難而諫其君者非為身也將欲以匡君之過矯君之失也夫君有過失危亡之萌也况君之過失而不諫是輕君之危亡也人君于臣子諫而不聽是安其危而利其亡也輕其君之危亡者非忠臣也樂其危而利其亡者非明主也在昔唐虞三代之盛君臣都俞吁咈于一堂之上言者無貲辭受者無難色是之謂至治三代之下人君于其臣之言或聽或不聽而治亂亦因之不足論也

陛下自登極以來亦嘗求言然聽之者不什一拂之者
嘗什九臣子有逆鱗之忠陛下無轉圜之美臣等近因
聖體屢爾違和且務學親賢保聖躬數事上塵 睿覽
其間千百數言自謂披裂肝膽頗皆切于陛下心身之
學又竊謂陛下於此必將有所感動覺悟深宮幽
邃之中有篤恭持敬之道如禹之祗敬湯之日新文王之
小心翼翼武王之以義勝欲則於聖學聖躬少有補
裨而臣等之職盡矣近者伏覩聖報奉聖旨該衙門知
道欽此臣等愚昧誠不知所謂至于遠近傳聞之人亦謂
陛下不宜有如此批荅也夫所謂該衙門者如今之六部

三法司有執事之屬也故凡金選禮選錢穀申兵刑名土
木之事則固其所司存也謂之曰該衙門知道可也至於
臣等所言乃 陛下身心之學非可以外求也此在

陛下自知之而自行之該衙門何與焉語曰為仁由已而
由人乎哉明言為仁之道在已而不在人也夫臣等所言
非臣等之言也先儒之言也非先儒之言也古先帝王之
所以保身保民永年昌後之道也使其言之可用 陛下
當采而行之使其言之不可用亦當明示譴責以為言官
失言者之戒今徒諉之于該衙門毋乃以其言為常談不
足聽信姑為是尋常推托之詞抑或以其言有所拂戾于

聖心而為是距絕之詞也夫人主之患莫大乎距絕人言
傳曰訑訑之聲音顏色距人於千里之外士止于千里之
外則讒諂面諛之人至矣與讒諂面諛之人居國欲治其
可得乎甚矣人言不可距絕也臣等竊思今日如此之批
答非 陛下之過也司章奏者之過也然其端有二或隱
匿不以上 聞或標擬不由 內閣是謂攬權夫人主之
病莫大於權柄下移而蒙蔽人主之聰明為國大蠹其罪
浮于亂臣賊子以 陛下左右腹心之臣而負此二者之
大惡 陛下又可一日安枕而卧乎蓋蒙蔽者必于攬權
苟權一入其手則其蒙蔽者無時而可解也我 武宗

皇帝在御之日十五六年之間 國不得治天下不得安
寧者其弊正在于此 陛下所親見者也奈何今日又忍
蹈襲之耶臣等職列諫垣遠在南服凡有見聞不敢隱諱
竊念騰章于數千里之外待報于一二月之間心有餘而
力不逮言雖切而勢愈隔其所以望 陛下者如日月焉
惟恐其虧也今臣等言焉 陛下復不以臣等之言為然
漫不加省而果於棄之不少愛恤則臣等之心益孤矣夫
臣之言不足聽也不足恃也今老臣耄德忝起于朝法家
拂士襟連于 國其所以排琅玕而吐閭闔吐忠朴以報
明主者方未已也倘 陛下不加獎用一切以是拒之其

所以失忠良之心塞諫諍之路豪傑解體奸邪萌志聰明
日蔽于上惡政日加于下唐虞三代之治無復見于今
日矣伏望陛下自今以後勤萬機而不間于旦暮之功
俯群言而不遺乎芻蕘之善言切于身心者務躬行之不
怠利在于國家者務舉行之必力則君身正而萬事
理國家治而天下平矣

竭愚忠補袞職以降萬世治安疏

劉奮庸

臣一芥草茅謬通任藉昔荷先帝簡命供事

潛邸臣

職雖微賤豈徒效章句之末技以希身家之富貴哉區區

狗馬之忠冀將有所啓沃以裨皇上身心之助今

日治理之地爾伏自即位以來六年矣海內無不乂安

而災沴未消外夷非不咸順而伏機可慮朝政若振飭

矣而樞柄漸移仕路若清肅矣而熟養仍舊凡若此類百

司庶府引領勵精之治海隅蒼生思見德化之成其

仰望於我皇上者何切至也而近日精神意氣漸不

逮初臣潛邸舊臣也夙心積慮豈忍超然謹條列五事

冒死為 皇上陳之伏惟 帑神採納獨出 英斷 宗
社幸甚 臣愚幸甚

一曰保養 聖躬蓋 人主一身天地神人之 主必志
氣清明精神完固而後可以當萬機之繁 人主前後左
右何者非聲色之娛嗜慾之端此非大智大勇鮮有不為
所動者而精神意氣坐此日損雖有願治之念先失其振
勵之本矣如之何其可伏願 皇上繼今以後思此身付
託之重念此心保守之難凝神定慮忍性抑情毋逞旦夕
之樂而輕萬年之慮毋以有限之精神而當衆欲之攻如
此則 君德日益清明 君身日益強固 宗社無疆之

乎非 盛世所宜有也伏願 皇上嘉其批鱗之忠怒其
愚直之罪有 詔賜還布列庶位廣仁宥於既往作直諫
於方來不惟 皇上包荒之德同於獲載而諸臣之感恩
圖報於將來 永矢啣結矣 皇上誠味臣之言而默自
改省臣雖干冒斧鉞死亦何憾如不以臣言為然而但假
之優容臣即叨冒官秩碌碌班行思之有餘愧矣并臣所
敢知也伏乞 皇上留神省覽 宗社幸甚 臣愚幸甚為
此具本謹具奏 聞

敷陳大政切務以裨中興盛治疏

夏 斌

臣自通籍至今叨荷 國恩十有九載念昔經事 先帝

濫厠璫闕未效涓埃旋蒙謫調漸緣收錄膺歷外臺頃者

皇上龍飛御極臣以服闋赴京忝見漢官威儀快覩 天

顏咫尺謨辱 甄拔遂貳同 列感激 洪恩誓圖報塞

顧臣駑劣殊非駿逸之才日聞異群徒循驗寄之舊茲勤

千慮之積用愧一得之愚謹以時政之大有關於 國體

有切於 聖躬者列為六事冒昧上聞伏乞 留神詳覽

俯賜採納施行臣愚無任惶悚懇祈之至緣係敷陳大政

切務以裨中興盛治事理未敢擅便謹題請 旨

一曰修朝講之實 祖宗朝會群臣每日 御門奏事
四方人員無問大小並得引見蓋欲不時咨問備知地方
之災害生民之疾苦政事之得失官職之賢否俾下情得
以 上通 天子明見萬里法甚善也今日事引奏竟成
虛文而所奏者又多泛常瑣屑不足以聳聞聽行之既久
自不覺其厭且玩矣臣愚欲乞 皇上於 御門奏事之
時間垂 清問下及蕩蕩使舉朝政觀萬方易聽下民因
之鼓舞職官有所警惕機括轉移之間治化流行之感貫
速於此仍乞 勅該司今後所奏之事務擇緊要重大者
如某處奏何災異某處報何聲息某官保舉何官員賢能

某官叅劾何官員貪濫其他瑣碎不必瀆聞如此不惟
聖聰日遠聖心日謹在廷之臣亦莫不知所觀感戒惕
矣至於講筵之設原為進德之階非若經生俗士尋章摘
句為也臣愚欲乞皇上於講筵之後即與大臣商確
政事評論職官諮詢風俗料度夷情上行條對失次欺蔽
不忠者科道官得以而糾之將見諸臣日近天顏渥承
顧問莫不爭自磨濯益脩職業而聖德益純國體愈
練施之政事固有不得其理者矣伏乞聖裁 二曰肅
郊廟之儀人君父天母地而紹統於祖宗郊社禘嘗所
以虔報祀而重本始也皇上郊社廟祭親臨舉禮誠之

至矣第 乘輿出入倣驛森嚴萬民於此具瞻四方由之
式聽 居尊之體不容或褻臣愚欲乞 皇上自後出幸
南北貳郊駕旂在前屬車在後冠服 御輦率由舊章以
示臣庶至於行禮之際仍 勅該部諭令執事者雍容雅
餽毋致贊呼迫促拜跪參差庶乎致敬致慤各竭其誠來
格來歆並受其福矣伏乞 聖裁 三曰慎燕息之容宋
儒有言人主一日之間親賢士大夫之時少接宦官宮妾
之時多燕息之間正謹獨之處也臣愚欲乞 皇上於退
朝之暇不忘 臨御之儀凝然淵默端然靜重詳繹 祖
訓熟閱奏章非禮勿視非禮勿聽非禮勿言非禮勿動將

見食息起居威儀不忒前後左右閒隙莫窺詭養精純
天德於茲日懋神元翕聚 聖壽為之日增是伏乞 聖
裁 四曰降心旌之託八君一日萬幾所與共理者宰相
也古稱君明臣良治具畢張又曰相道得而萬國理輔弼
之所係大矣臣愚欲乞 皇上日親輔臣慎終如始即票
擬之未合惟申 諭以示公苟啓沃之可從務 俞允以
示廣而為大臣者亦必仰體 眷倚之重共據篤恭之忠
受善責虛而濟之以斷接下有禮而處之以公鑑別惟明
淵惟誠偽之辨取舍攸當務核名實之真庶乎上下交而
德業成矣伏乞 聖裁 五曰重耳目之寄自古言官之

設以為耳目之司故史稱吾有李勉朝廷始尊又曰今日
膽落於溫御史言官之重由來遠矣我朝建立科道以
司糾彈凡以肅百僚振紀綱使人有所憚而不敢肆也頃
者朝廷之後乃有中官群歐御史幾殞節奉聖旨將
許義等拿送法司重究又申諭王廷等紀綱法度朝廷
自有主張臣竊謂乾綱獨奮將必重懲群惡追究王使
各正其罪以明至公而後已無何許義不必送法司矣王
使者不究矣李學道又從而調外矣紀綱法度于此大紊
恐非所以示四方傳萬世矣夫中官者陛下之僕從也
言官者陛下之臣子也漢時關京忌諱司隸校尉尚得

以礫諸市今許義一賤厮耳御史纔行糾參即被毆辱身
命未保謫調隨加解風憲之官以快近習之忿重不諳之
譴而輕無 君之誅傳之海隅遠夷將謂 中朝御史被
內臣痛激幾死又調外任紀綱法度一至此哉且許義何
人敢於 朝堂之間肆行兇惡抑有何力能驅策群小耶
此必陰有所受乃敢欺 君辱 國如此所謂豺狼當道
安問狐狸顧不求首謀之人而薄示加功之賞耶夫御史
巡城據法行事亦其常職今橫被毆辱毀裂冠裳即驟遷
以獎之平生意氣如此沮喪甚矣況謫之乎學道一人不
足惜其如耳目之寄何其如 朝廷之綱紀何臣愚欲乞

皇上申飭近習追究主使明正 憲章以示懲創其御史
李學道仍乞 勅下吏部議擬仍令照舊供職耳目無所
壅蔽綱紀不至陵夷官寺知警而群工思奮矣伏乞 聖
裁 六曰專督撫之任 國家控制夷狄闕堡星列將士
雲屯督撫分閫調度備亦密矣承平日久邊事日非黠虜
跳梁為謀巨測頃者逢選督撫之臣責以簡練之任 戒
諭申飭每履 聖懷其所注意於邊防者何切也夫軍旅
之務自古為難西北之患于今孔棘自非曾試其事目擊
其時與身履其地者固非可以揣摩測度據紙上之陳言
為壘中之勝算也今衆言盈 廷群策角立督撫動有掣

肘行多顧其何以鼓精神而樹勲業耶臣愚以為備邊
御虜惟在擇人既得其人矣則必聽其言行其志兵馬錢
糧衣甲器械機宜調度一任其所為而無中制焉又必寬
其文法假以歲時一捷具錄小劬勿罪而惟要其成功至
於三年無成冒破欺怠者治以重罪不宥如此庶乎賢者
得展其謀猷不肖者難免於罪戾而虜患不足平矣伏乞
聖裁

勤朝講重延納以臻新政熙隆跡

張 鹵

仰惟我 皇上丕受 乾符嗣登 太寶人心嚮慕千載

一時臣祇以職任事宜塞責應 詔未即盡言非敢默也

固以紛沓章奏已盡諸凡亦以 皇上未有行事而臣固

未得其所以言也今自冬徂夏已歷三時謹以三事大端

頗有明徵而萬政弘敷盡此攸繫者上為 皇上陳之一

曰 早視朝以肅觀瞻臣惟惟天行健而奉 天者所宜

先惟勤有功而勸民者所最急故憂勤惕勵為帝王相傳

不易之心法以致治良圖誠未有先于是者我 太祖高

皇帝大訓有曰朕夙興視朝日高始退至十復出迨暮乃

罷又曰自古國家未有不以勤而興以怠而衰天命去留人心向背皆決于是甚可畏也自是國家九制隆平率先是訓今皇上自臨御以來每視朝太晚向當先帝梓宮在殯山陵未畢之時而晚固以此時奠獻几筵瞻依哀慕實以式崇大化之本不欲遽嬰機務之煩若此者臣固得而解之也今大喪免矣山陵畢矣雖聖心孝思無窮而人心屬望殊切乃皇上每視朝之際為祖宗既退朝之時通連晦朔或晝漏移刻鐘鼓方鳴或曙日盈廷班行未就又視祖宗退朝之時而更晚矣且臣僚所切望于皇上者固欲振久弛之人心也今每

見諸臣退 朝各清明之氣盡消簿領之程又促恐或廢
事實切憂惶是于臣僚之屬望者而未有以答其心

先帝嗣位之年每朝過早惟二十年之後漸緩 朝儀故
復以益愆成美托之 皇上今若常 龍飛虎變之初而
不隆 宵旰明作之績是于 先帝之付托者而不有以
成其美臣故以是切望 皇上急為改圖然臣所望者非
欲 皇上一日三朝一如 祖宗之舊亦非欲 秉燭視
事以為過甚之勞惟望 明初發而視 朝日既出而
罷朝則截有規程人心既定時方炎暑 聖體亦安所以
樹萬年四海之觀瞻者此其一也 二曰勵 經筵以資

啓沃臣惟帝王之學雖千韋布不同見聞之功由于積累
則一盖人心易危道心易微一日之暴良不足以勝十日
之寒接賢士大夫之時多猶不足以勝其接宦官宮妾之
時少故必功不間斷者而後可懋其修為又經以載道固
所以盡帝王之心法而一帝一皇一王一霸又各自有心
法之不同史以載事固所以盡古今之治亂而一代一朝
一人一事又各自有治亂之不一講學之功必次第詳陳
始末悉述則知亂生于治而圖治為難否多于泰而保泰
為難邪問于正而去邪為難善雜于惡而從善為難其用
昭鑒戒而啓經綸故必義不間越者而後始綜其條貫

學資君德誠非易易哉 祖宗披荆棘擐甲冑於時之至
難學而學者莫先于 二祖自是勤學一事為 累朝世
守家法在 先帝初年其輔臣頌之有曰憂勤惜大禹之
寸陰始終念 高宗之舊學大極典謨之奧細包史冊之
繁可謂修為條貫備極無餘至 遺詔諄切猶以廢學為
恨今 皇上初御 經筵宥密凝神恭默體道于諸臣所
進奏講章直講必諦觀詳聽灼有心得其人心鼓動所望
以紹 聖學而甚至治者何如也夫何 經筵方啓而即
罷 日講間日而數罷近復蒙 宣諭 經筵日講俱暫
罷停臣愚以為勵精之初即其如此駸循以後更將若何

講筵經幄之臣必有為 皇上言者經今數日杳不一聞
夫近代人主有能開聽納復御 經筵則史必特書以示
褒與 皇上何如主也詎可謂 成命已頒即默不以告
臣故以是切望 皇上速為改圖然臣所望者非欲
皇上竟日窮年以下同于韋布亦非欲分章限卷以苦偏
于章程惟望 於禮部所請 經筵日講之日俱有定期
矣非關遇 大朝會典禮其功不宜少停 累朝所御
經筵口講之書俱有定名矣不可趨為簡捷避忌其義輒
為間越已 內殿清涼亦不侵炎暑繼以盛夏將臨 經
筵難十且儀宜且暫嚴其 日講之儀固殊為簡便仍乞

宣諭照舊施行于日講之官更乞量加員數當講之際
更乞親賜討論至于經筵事宜亦更乞裁定是後
寧期簡約而常行無苦議文而暫廢所以收啓心沃心之
實功者此其二也 三曰勤 顧問以決壅滯臣惟德業
成于上下之交而否泰係夫君臣之際自我太祖首著
君臣同遊之篇 列聖相承以為太平我 孝宗每與諸
臣論事多或連日或移晷君臣堂陛一藹然家人父子
之風至今大小臣民猶切頌播至我 先帝為西苑春遊
平臺夜召文華紀盛之時其來諸臣格心謨論造膝嘉謀
以成喜起休風明良盛事視 祖宗 列聖尤有烈光茲

惟皇上輿望益隆。曩臣嘗以大臣入閣奏事。必諫官隨入為請。即誤蒙首詔嘉納。今既數月矣。羣臣既無召對之命。輔臣亦無數語之及。歷稽先朝向所未有。況今士風傾側。國是倉皇。財用詘乏。甲兵疲敝。凡可憂甚危之事。舉萃目前。雖極力圖。惟恐將有失。而乃乘以虛文。怠玩之人心。臣固有不知其所終者。故以此切望。皇上急為改圖。旬日間于退朝之際。或日講之餘。首命輔臣六卿進之。便殿下及臣等。但列名諫署。亦輪次隨從。或親給筆札。或第為面對。令其於見今時政最急且大者。各舉數端。即陳所見。其言寧煩勿浮。寧畧勿泛。必求實用。

以濟時艱既盡群情隨加 聖斷果斷可採即 賜施行
如 日月一照臨雷霆一震發盡決凝梗大致訢令天下
雖大庶務雖繁固可目 皇上二言括興之而有餘所以
聖 明目達聰之機要者此其三也且 皇上即位以
來間多浮議即今臣民之疎遠無知者尚有諸臣民章奏
多不 省覽 官中鎮日惟事遨遊若此者固以三者無
勵精之跡以行之也三者既行則人心悅豫 義問宣昭
聖德益崇訖言自息凡臣等所欲言 皇上所當行者始
可期次第而舉矣臣犬馬朴忠煩言瀆冒無任隕越惟
皇上為宗社生民之留意焉